



建康集卷



宋 葉夢得

赴建康過京口呈劉季高



客路重經黃鵠前故人仍得暫留連  
長槍大劒笑安用白髮蒼顏空自憐  
照野已驚橫雉堞蔽江行見下樓船  
灞陵醉尉無人識漫對雲峯說舊年

將至建康將佐出迓

遙憐部曲遠相迎猶記當年驃騎營  
莫作揚州貴人看箭聲聊聽餓鳩鳴

再至建康

老罷那知力已疲君恩誤遣出車詩  
犬羊可有中原地熊虎空高大將旗  
江海百神朝魏闕風雲千里護彤墀  
白頭



再啟征西將深媿甘棠誅去思

推轂何堪付老儒腰間仍佩玉麟符千門萬戶照天關二水三山非故廬談笑定誰能却敵衰慵真自笑非夫淮南金鼓連滄海為趣嫖姚速破胡

府中即事

稍喜胡塵欲漸清離宮雙闕照層城不驚巷陌銅駝沒自愧兒童竹馬迎衰謝正堪仍簿領病慵久已廢杯行三山不動潮頭過洶洶江流自不平

坐笑往來頻俯仰之間迹已陳可是猶思建鄴水却

應喜近洛陽塵十年徧閱三行闕余自維揚臨安及今四

海奔馳一老臣未有夷吾在江左柴車空換兩朱輪

送模歸下山并示僧宗義為余守西巖者三首

自我離山間忽已兩改月饑人不忘食未坐先已說家僮

挾書至驚起慰愁絕推尋到鷄犬問訊窮曲折此生豈多

為一壑萬慮滅可能復大錯更鑄八州鐵江東顧汝歸馬

蹄輕初不恨觸熱慙慙報松竹吾豈成久別

端居探幽竒自謂畧已徧昨登西山巔雄絕昔未見溪湖

莽吞吐雲物紛百變乃知十年閑尚或遺勝踐巢成軌

棄去我豈秋社築南山絕頂亭為吾課童僕開闢盡二面

莫言羊腸險徑小煩屢轉杖藜不用扶吾脚猶爾健

生長在山間從翁守蓬戶人言膏梁子粗免污紈袴官居

無多戀整止復遽去家法恐未傳此心良已素義禪脫從

我似識此間趣西巖鬱嶽岑久斷俗子路聊持山中節為

我主留務封陸際湖海雲月皆所部



建康舊俗貴重九上已諸曹皆休祀神登北山參議  
馬君獨不出攜詩相過因言石林之勝次其韻

倦飛歸鳥正思還扣戶聊分半日閑勝事漫同談栗里佳  
時休笑負龍山簿書已老無餘力香火朝真有舊班他日  
尚期能過我試窮千嶂共追攀

去歲以九日期賀子忱徐敦濟祝子權為松竹臺之  
會作寒字韻詩唱酬數返今歲郡齋獨坐慨然有懷  
復用前韻寄敦濟子權時皆在湖州

地近中原怯早寒一杯何去復追歡同尋澗壑閑誰共強  
逐風塵老自難歸夢誰知元有約故情應得舊相看閉關  
且示維摩病圖畫他年付瓦官

世傳頌凱之畫維摩像皆此間瓦官寺本也

### 郡齋望蔣山

十年在空山未覺與世殊再來撫城郭始悟非吾廬豈不  
有華屋旌旗拱上都我冠坐清旦百里前走趨而我麋鹿  
姿僂然若囚拘忽看北山岑突兀當坐隅歡言顧之笑便  
欲凌崎嶇似我槿籬間層巒儼相扶瞻不得往起步空  
長吁少年四方志願矐略九區衰慵一如此畢願終田間  
拙艱固應爾豈但悲老夫

### 自和

生涯一茅屋物役忘萬殊再為東諸侯作軍蒐被廬追尋  
念往迹六鷁慙宋都余以請官祠去官浩歌記土風誰能和且趨  
自笑良已隘真成撮株拘聊云效知止未敢傷廉隅茲山  
閱人多龍蟠委崎嶇寄我千里目筇杖尚堪扶但愁見中  
原驚心愴嗟吁何由返我室小徑遵芋區未用懷遠遊蒼



范賦三閭明當秣吾馬解組戒僕夫

西齋初成廨中舊有太湖石數十枝因植之庭下

萬壑千巖不易求壺中聊寄小瀛洲稍看砒兀雲峯出便  
有檀欒桂樹幽絕境自知難遽忘竒縱爭怪獨能留山翁  
已老猶免戲漫擬伸箸一散愁

與晁激仲夜話

外家文采到諸郎稟稟辭鋒未可當伴我何辭共戎馬憐  
君聊欲濯糟漿激仲以池州酒正從余辟殘年落寞風塵際永夜從  
燭光祇恐扁舟吾欲去病慵無意 淮陽

次韻答激仲

牛渚誰逢臨汝郎參軍暫肯佐戎行世緣不擬營三窟入  
事那求饋五漿春近嶺梅橫 藥夜寒霜月落飛光十年

情話何由盡亦亦傷心嘆渭陽

再答

生涯久許捕魚郎鳧鴈相追不亂行但遣陶廬有松徑不  
辭楚酒醉椒漿交情老栢寒方見妙語靈珠夜有光回首  
漸知歸路好已看梅柳動初陽

又答

家聲合繼紫微郎晁氏自文元文莊皆常歷知制誥至以道復為中書舍人不獨詩同  
沈鮑行晚歲清談淹幕府中原喜氣望壺漿頗聞時論憐  
衰朽空愧君恩負寵光肯許輞川期後約彈冠知不借王  
陽

閱武士回邊報與山中信併至

椎牛饗士隘轅門投老兵間強自論稍喜並邊無牧馬却



慙空帳有驚猿乞盟似欲回天意排難誰能報主恩壯志  
蹉跎真便爾獨懷搔首望丘園

雨夜西堂獨宿

華屋非所安憶我三間茅閉關傲初寒坐聽風雨交燈火  
微暗淡松篁雜蕭梢一枝寄宿鳥自許無傾巢我非乘桴  
翁詎敢辭繫匏竭來亦何事大士從僧包忽聞報嚴更鼓  
鐘亂鈺鏡慨然念故棲此地寧久拋君知芥舟微但可浮  
杯坳去矣無更疑作詩聊自嘲

雨夜與模論中原旦起模與徐敦宗游清涼觀形勢  
嘉其有志因以勉之

千年石頭城突兀真虎踞蒼茫劫火餘尚復留故處大江  
轉洪濤騰踏不可御空城寂寞潮日莫獨東去登臨欲弔

古俯視極千慮吾兒勇過我蓐食穿沮洳謂言撫中原未  
暇論割據功名亦何人我老聊自恕它年報國心或可借  
前箸無為笑頽然已飽安用飫

連日邊報稍希西齋默坐

鼓角遙聞出塞聲邊風吹鴈過高城疆陲無復戍已尉盜  
賊猶憐壬午兵歲晚胡床閉深閣夜長刁斗聽連營便須  
從此傳烽息要及春農論勸耕

獨坐不得眠讀舊書

青燈相對久無眠擁毳無人伴夜閑閉戶便能忘屢迹柱  
香時自續爐烟辭家屈指驚三月撫事關心愴十年漫展  
殘書亦安用可能猶欲絕韋編

懷西山



西山十畝強高下畧不齊嵌空抱竒秀上有凌雲梯小屋  
八九間茅簷敢辭低所欣面勢好老稚通扶攜密竹轉脩  
徑老松故成蹊仲冬景氣肅碧草猶萋萋仰視天宇大四  
觀渺回溪徐行信足力未畏成顛踣用意各有適孰云無  
町畦平生幾濡首末路多噬臍不作巢幕燕肯從觸藩羝  
胡為濫麾鉞坐聽鳴鼓輦外物委蟲臂全生思馬蹄可能  
三徑草歸路老更迷

杜堅大夫作南窓求詩為賦

意得不願多心閑本長虛超然適有契天地良有餘頗念  
彭澤老所懷常晏如南窓僅幾何盪薄萬古初束帶悟已  
往世紛便能疎懸知千載情共有三間廬杜子老不遇買  
田賦歸歟西山鬱攢空江山繞故墟衡門閉松菊亦有琴  
與書邂逅一杯酒安知我非渠

送光上人還湖南光丞相吳元忠之母弟舊名惇字  
元常以進士入官已而棄家祝髮云

棄家忽若遺四海吳元常軒冕安足輕妻孥等豪茫古來  
惟仁者有勇故莫敢棖也自多愆此心焉得剛相君抱壯  
烈慷慨志亦償徒悲蕭長債屢折終堂堂子居真俗間袖  
手每在傍十載復相見掛帆上瀟湘

山間每歲正月望後梅花正開多與客飲花下今年  
郡解獨坐十四夜張暘叔晁激仲相過共話宣和間  
事慨然歸不能寐因以寫懷

山頭野梅白玉花月明弄影紛橫斜青天無雲萬峯立下  
有十畝幽人家年年春歸不暇省但掃雪徑尋寒葩老夫



已忘少年事燈火豈念更繁華一杯起步徧空谷破屋歸  
卧瞰朝霞陪都復來亦何有凜凜殺氣浮高牙重關深鎖  
夜漏永忽記昨夢翻長嗟景龍門前一月會金盃賜酒餘  
雄誇神州陸沉近歸我漢節方議通胡沙天翻地覆那得  
料恣復更聽漁陽搗

次韻馬叅議同游蔣山

華屋驚隨劫火飛江山空自繞邦圻靈蹤可便超千載妙  
解誰從寄一微着屐尚堪寤碧落據床聊伴俯清輝追尋  
會識關心處未怪衰翁苦憶歸

再次韻

頽垣敗屋落花飛草草春光亦故圻但愛野塘輸綠淨不  
知風景轉清微帳空尚憶猿驚曉基廢猶傳鳳覽輝女兒  
自無平賊意坐來休笑久忘歸

三次韻

荒林寂寂鳥飛飛舊事那容數一圻山色自憐雲泱莽暮  
寒猶作雨霏微談餘故喜仍在勝境端知玉有輝問取  
塔中黃面老此生何處是真歸

四次韻

雨厭殘雲暝不飛亂紅猶欲點春圻蔣陵路絕人誰到蕭  
寺庭荒迹已微偃蹇松篁空自老參差觀閣舊相輝令威  
等是千年客想有遼東獨鶴歸

偶至劉少師園二首

葉底黃鸝一再鳴故知久住識人情習家池館元無禁應  
笑山公自懶行



老木參天拱十圍何妨桃李間相依却憐韓令功如許不為山丹少霽威

蔡子因相過留踰月

解作江山一月留仲文儒雅更風流欲知爵躍心能喜正愛蟬連語不休築室君方論並舍子因約同居雲上歸山我已辦扁舟交親四海今餘幾萬事傷心付白頭

次韻再答子因

人事紛紛去不留客心空感大江流已拼瓠落真何用那得鐘鳴尚不休鄰里朱陳無別社江山朱郭有同舟若為便覓苕溪路六月明珠剝芡頭

蔡子因前韻留別再答二首

早時物望冠陳留蔡氏自言出陳留蔡謨後晚悞禪心更不流安用前

身真阮籍

頃有方士言子因為阮籍後身

久知此道得孫休千年會有歸

來鶴萬事元同不繫舟邂逅一卷隨地有不妨衲被對蒙頭

已議營屯列上留稍欣羣盜障橫流三時舊業終應在萬里長征亦少休和策但令均挾纊壯圖何用焚舟東都自是興王地虎踞寧須問石頭

劉太保招撫淮北劉馬軍屢奏捷

先聲已起故將軍卧治何勞病使君冠帶豈能忘舊俗山河亦自惡妖氛羽書奏捷無留敵輿地論封有策勳橫槩賦詩非我事車書會復見斯文

題子因雙鳩百葉桃畫

百葉細桃照眼明繁枝似見兩新晴故知睡足聊相並不



作林間逐婦聲

徐敦立罷吏部郎官出守天台待次卞山舊居因寄  
嵇康不作絕交書出處蕭然兩裕如錦帳不妨游省戶草  
堂還得賦郊居傾崖濺水青雲上夾道輕陰落絮餘肯記  
舊游聊待我未須催駕赤城車

陳子高移官浙東戲寄

幕府陳琳老官身戀故溪解談孫破虜那厭庾征西未擬  
頻刀筆聊應謝鼓鼙登臨如得句小字與親題

戲示幕客

不用黃金更築臺一時傾蓋盡奇材關中豈是穰侯物須  
怕諸侯客子來

章幾道將歸小飲懷謝城父

中年甚畏別交情况復雲山舊結鄰澗谷何時同笑語干  
戈已老更風塵少留對榻聊分坐多病持杯漫幾巡賈傅  
長沙知健否洞庭波浪渺無津

聞邊報示諸將

插羽驚傳赤白囊胡行如鬼尚跳梁頗聞廟算無遺策但  
遣封人謹豫防送死定知天悔禍追奔寧使汝爭疆將軍  
剩有封侯印盡掃無令一鏃亡

虜酋復過河王師出討

羽檄初徵天下兵誤慙一陣守王城秦兵出傾終何得漢  
將征遠會掃平便遣幽燕驅號令久憐河洛汚羶腥書生  
豈解論幾事詎信平涼有劫盟

始議講和余  
數言其不然

遣晁公昂按行頻江營壘



他日傳烽望夕烟重來老更負戎旃我言固自平平耳王  
事那辭數數然轉餉未應勞木馬摧鋒猶或要戈船天威  
本自無多殺萬一征和屬此年時聞虜遣烏陵

聞兀木將過淮再遣晁公昂規師

敵酋屢慣騁長驅未省新軍有被廬時張韓兩軍治師甚肅士極賈勇快

飲勿辭金鑿落先聲須破鐵浮圖虜將下親兵皆精練號鐵浮圖趨官爾

自疲千里虜遣使往來中國號飛將吾寧較一夫試向八

公山上望當關何用守濡須壽陽為江淮襟喉曹操先得之故軍每至濡須東晉能保

有故謝玄有肥水之捷云

### 登南城

大江南渡是長干北望清淮歲已寒廢壘至今聞鶴唳蒼  
山從古自龍蟠鬢毛白盡空看鏡髀肉銷來尚據鞍折箠

不能管黠虜遣時猶有漢衣冠

### 與陳子高夜話

鼓角開東道山川壯別京病慵憐竊食幽憤敢論兵廢簡  
鉛黃暗馳囊赤白驚衰衣聊自喜時見魯諸生

### 送馬參議觀國從辟劉太保

伏波老自厭壺頭壯志諸孫凜未休稍喜犬羊從絕塞即  
聞貌虎靜中州先聲早已傳推轂婉畫聊煩佐運籌好去  
劉公書一紙無忘老子南樓

### 次韻馬參議留別

戎車百兩去難攀秣馬前驅矢石間析木舊津吞朔易神  
都新令懋完顏傳聲已報連三捷觸熱那辭冒百艱束縛  
會看擒頡利灰釘何待執戎蠻清談一笑時能共妙語干



篇未可刪緩帶且從黃閣卷我冠行奉紫宸班分攜生歎  
虛懸榻老病懷歸祇故山他日小舟能過我萬峯深處有  
柴関

寄潭州謝城父

南國波濤已過春稍清群盜翦荆榛孰知賈傅領多士但  
說番君得遠民痛飲千鍾應可強傳書一紙未能頻臺評  
袖裏猶多在莫枉汀洲詠白蘋

久不飲酒厨人獻白醪却之

老大無堪百不能年來但可飲三升齋厨何用須佳釀莫  
遣征南誤見稱

立秋二首

江上西風萬里秋際空高浪洶回流他時譽賊真非策此

日摧鋒蓋有謀天險漫能憑故國陸沉端復恨神州將軍  
競縮封侯印誰為吾君更解憂

蕭關隴水隔天區壯士何人是破奴一日頓傳三節度

是日

聞陝西三十年空闔五單于坐談激烈心猶在疲俗彫殘

帥並建節喘未蘇安得倉箱盈百萬少令天下足軍儲

秋高申戒諸屯示幕府

草枯馬健已高秋堂上應須早伐謀傳箭猶聞聚 蜂控  
弦那得犯貔貅書生會繫單于頸壯士誰吞長敵喉快使  
營平歸印綬貂蟬敢望出兜鍪

寄順昌劉節使

四海胡塵久未清遙聞苦戰有奇兵妖氛盡掃人誰敵捷  
奏初傳我亦驚授鉞已欣傳帝澤揮戈終見靜王城軒臺



固有英靈在更遣將軍得令名

二月六日虜騎犯歷陽方出師客自吳江來有寄聲  
道湖山之適趣其歸者慨然寫懷

松江浪靜如鏡平菰蒲長春秋水生晴沙回鴈久未到坐  
聽白鷗憎眼明五年辜負釣船約故人疑我真逃盟豈知  
塵纓不易濯正想滄浪之水清朝來鐵馬暗江北中流疊  
鼓雲濤傾樓船十萬下采石旗纛滅沒天戈橫書生事業  
今乃爾授鉞孰敢辭專征豈無傳檄走飛騎漫復長嘯登  
高城文思天子民父母大度未忍麀奇兵澶淵一矢安五  
也明日儻或傳諸營

淮西軍大破賊兵連六告捷喜成口號二首  
一戰聊糜十萬師西來捷報走黃旗六羸壯騎終去九

虎將軍亦謾為

賊將龍虎輔國等將軍皆其用事尊爵

面內疲民元不改

柘

之捷驅虜吾民盡復得之

從中勝算自無遺

自賊兵過淮凡指授諸將盡從中出

臨軒想

見天顏喜百辟歡聲動玉墀

地豕何知闕近垌且欣麀戰掃羶腥寄聲急走破羗帖歸

路還經征虜亭多難兵間頭更白

事見光武

放懷物外眼終青

花殘不負巖邊約更看前焚老上庭

老上龍庭匈奴地名

為山亭後有小池叢石間得石螭因以斛汲水導注

之

微流自作小潺湲底處奔涯落迸泉驟喜忽聞飛雨過却  
疑驚起老龍眠憑軒但遣時醒耳裂岸何須去拍天索寞  
歸心誰與寄家山不到已三年

為山亭移植冬青等近遂成陰



一寸蒼根手自鉏年來繞屋亦扶疎客來但愛青陰好不  
見幽人澗下居

小飲示幕府

邊書日夜急王旅方徂征我非劉越石長嘯徒登城緬想  
豺與虎行當築鯁鯨傳車日邊來風雷走天聲

連日中遣燕人齋金

帛犒師者經過

黃旗三面至捷奏紛紛橫天險限南北長江正東

傾諸君亦良苦唾口爭請纓誰云凌煙閣自昔無書生危  
酒安足辭勉當建雄名

李頎詩請君試上凌煙閣若箇書生萬戶侯

建康集卷二

徐敦濟書報嘗過余石林

宋葉夢得撰

繞澗新添數百竿故人書為報平安似聞謾謾山風響正  
想陰陰夏簟寒老大不能窮蠹簡歸來便擬掛塵冠一杯  
且覓林間約莫枉山王廢舊歡

夜聽莫撫幹彈琴流水操

故山不在服遠想流水聲佳人南風手起我澗谷情十載  
厭鞀鼓囂塵亂鳴鉦蕭然洗病耳為鼓一再行度險微斷  
續奔前忽琮琤淒風拉遠響薄月當微明亂石拱高下回  
環亦崢嶸吾歸正自爾猛士方西征年少勇過我犬羊羶  
王城請更平戎操盡掃河洛清



王 送沈傳曜

下峯摩青空東望烏氏墩豈忘宿春糧終媿一欵門邂逅  
此相過傾懷得徐論人言解牛刀要使治劇煩未悟清廟  
罷朱絃列壘尊我衰百慮息但念三畝園王師肅西征萬  
馬先雲屯何力償賜履緬慙羨歸軒寄聲飛艦舟想見浮  
鴈村清冷可尚釣無使雪水渾

八月二十日

賦 覺涼風入軒窓亦自幽漫能持麈尾終憶釣槎頭一我  
從添老愁予不為秋新醅知熟未衰謝茗為

偶書為山亭五首

為山亭下小嶺岼只欠蕭蕭竹數竿但遣飛流時湫玉且  
將歸思為翁寬

微風似與洗庭除石枕蠻藤不負余八尺方床聊自足可  
須仍要讀殘書

僚吏相哀白事稀抱琴時有弄清微何妨共倒樽中綠不  
怕鳴騶問道歸

羶穢初聞潁水清東君更復過蒙城應須鄂渚兵同入賊  
壘聊煩盡刻平

使節交馳數路分頗知盱食念前軍疾須圖上金城策一  
見真堪勝百聞

賦 次韻程伯禹贈宗室趙朝請

人物相望不並時使君冰鑑有真知未論鯉窟傾三語只  
闢詩壇自一竒擾擾干戈猶戰伐紛紛簿領更喧卑應須  
便作高軒過好德何人佐我儀



次韻程伯禹用時字韻見寄二首

衰病侵尋豈故時暮年懷抱祇公知  
疆論出處初無意底有文章更好奇  
王氣山川元自壯歸心茅竹敢趣下  
王正歷盡使遺民復漢儀

漢道中興此一時虞亡不臘爾何知  
地中鳴角無多怪堂上論兵固有奇  
夢櫟那求梁棟遠槍榆正羨羽翰卑  
淮陽汲直猶高卧願看簫韶集鳳儀

送表弟晁公老洽海師幕

巖色相望數寄聲十年湖海更關情  
談鋒尚憶傾甥舅鬢雪何堪數弟兄  
飽讀父書聊自足深知民事却須評  
揚旗且逐樓船下萬里波濤本不驚

公老說之子罷遂昌令頗能言浙東民事

題晁公老惠崇溪山

荒林翳宿莽脫木寒無烟不知三間茅  
中有幾醉眠山遠尚見雪江空欲吞天  
歸舟定何許滄波方渺然

再賦

惠崇殘筆老尤奇袖裏溪山每自隨  
欲識滄波無限意此間惟許當家知

觀化堂編校舊書

赤日真能永微風亦自涼故應便北戶  
何敢厭東廡汲水聊為戲繡書却未忙  
平生閑與懶併覺味兼長翰墨他生業  
山林晚歲心那知身已老但覺意增深  
捉麈誰能話扶筇可細尋晚來庭鵲喜  
似恐有歸音

憶朱氏西澗

澗下流泉澗上松清陰畫處有層峯  
應知六月冰壺外未



許人間得暫逢  
憶向中流置竹床  
萬錢無處買清涼  
只今路斷無來客  
自撥新篘醉幾場

大雨後為山亭獨卧

過雨虛簷氣稍清  
卧聞刁斗起連營  
幾看薄月當軒過  
驚見陰蟲繞砌鳴  
洶洶南江浮靜夜  
寥寥北斗掛高城  
白頭心事今如許  
慙愧兒童話請纓

七夕

七夕仍殘暑三年記  
此宵傍簷依嶺月  
歌枕聽江潮  
瓠大何妨拙槎迴  
未覺遙可須論乞巧  
河漢望星橋

送王陞歸知果州

何處西南是果州  
黃柑殊勝木奴洲  
使君自喜鄉閭近  
騷客仍憐井邑幽  
盜賊燕秦猶未息  
山川楚越已先秋  
原頭兵馬今多少  
更與將軍論木牛

祈雨

老農酣歌望捫腹  
早魃何為敢予毒  
九淵再拜歎神龍  
仰望但見屯雲簇  
天公愛民亦自惜  
我愧無功神弗福  
願看一洗注天瓢  
未須震暴如車軸

今年淮西感胡騎  
王師掃盡無餘類  
武王伐紂報豐年  
今者驕陽豈天意  
求東三茅西采石  
塔中至人肯徒視  
明朝掣電駭翻盆  
婦子猶能飽遺滯

再任後遣模歸按視石林四首

巖石三年別君恩  
未許歸從誰尋草徑  
為我欵荆扉  
舊繞山千疊  
新添竹一圍  
故人如見問端欲掛朝衣



白髮萱堂上孩兒更共懷  
美孫那得見將母竟難諧  
已絕功名望猶疑出處乖  
此心終未穩何處復安排  
插架環千軸傳家有舊書  
展舒慙几案涼曝闕庭除  
破屋防懸溜殘篇足蠹魚  
好須重檢校局鎖莫令疎  
細路穿南嶺新松幾許長  
毋庸馳馬足祗疑轉羊腸  
便作高亭好初非亂石妨  
兩溪渾在眼似欲見帆檣  
祈雨未應復請於茅山  
采石庶幾得遂之

苗當七八月之間甘膏不濡  
何太慳飛塵蓬勃晝欲暝  
坐視雲物占群山五日一風  
十日雨天方勤民輔明王作書  
未敢頌風伯寄謝群龍少勞苦

群龍分馳不難興俗謂五月二十日噴薄雲霧隨飛騰中以後為分龍日  
田勿憂龜兆拆倏忽便看溝塍盈  
老農何功報神力但趣

官租飽軍食中原卷盡胡無人  
爾土明年更開闢

余每歲病肺往往坐達旦去冬以來偶不作遂得安眠

衰殘每苦病相纏粗喜今年勝  
去年未說清樽酬醉且

欣高枕得安眠風塵不報邊烽入  
聖澤頻聞好語傳時詔書屢

下存撫江北流人聞莫尚書周侍郎已自鄂州過江入漢上

再見狂胡欲請平將軍無事罷屯營  
傳軍已割淮塢地牙帳仍收鄂渚兵  
勝日身猶堪策杖衰年耳自厭鳴鉦  
角中初了東歸約安用區區峴首名

東園作草堂新成二首

官舍如何有草堂野人熟去是難忘  
池開月映千山迥檻



靜風生六月涼幽徑也從穿別圃小舟還似過橫塘深知  
幕府文書省盡付甘眠亦未妨

密覆荒茅已數重中開別戶更相容苦無公事妨人樂多

有清閑借客慵南浦潮平分賸水堂前池與北山路近得

青松近我北山怪翁歸意何能緩新築高臺見卧龍園中

見因積土作

三月八日草堂獨坐

四年身不到吾廬底處仍堪話左符閑閣漫憐公事少投

簪敢說宦情無軍聲早已吞窮塞指使何時返舊都故作

茅堂開水檻要知心自在江湖

徐惇立相過

茅齋一曲傍寒灣邂逅終年伴我閑契濶易驚成歲月追

尋空復望江山暫留客枕聽疎雨時久早遙想吾廬掩舊

關落寞歸心誰與話坐談聊為起衰顏

同惇立游蔣山謁寶公塔王荆公墓晚過草堂寺周

顥故宅也

我居在城府再至俄二年豈無山水心可奈簿領纏今晨

偶乘興適此賓從賢零雨洗驕陽谷中聽流泉憑高快速

覽正見江浮天至人本無心與我常周旋誰云喚不應汝

意自不虔余自到鎮每雨賜祈麥隴稍已滋橫水漲微漣

佳城倚華表拱木埋貂蟬暮過草堂寺借榻聊暫眠不復

聞怨鶴茅但連延歸路踐落日群峯鬱相先回風送遠

響墟里生晚煙吾廬悵何許東望良慨然

明日復游石頭城清涼寺再用前韻



大江洶西來故國今幾年我衰倦登臨坐愧雙行纏忽驚  
山陰集邂逅來群賢俛仰弔前古高談注淵泉千巖過宿  
雨餘潤滋麥天顏顏翳崖壁過午不得旋佛像再經始時兵

火後寺盡毀郡人再興佛殿

此邦心亦度稍欣臺殿新廢沼依淪連坐

馬化龍僅作螂捕蟬相傾走掣電詎暇安枕眠六飛暫東

巡恨爾不少延尊胡久凋殘屈已今我先衰憊乘一陣無

功記凌煙乞身自茲始此計君儻然

又明日復同惇立總領吳德素運使章思召過天禧

### 寺登雨花臺再用前韻

言經朱雀桁復度白雞年

去歲辛酉

謝公不可見廢壘蔓草纏

三日瞰垆牧所懷多昔賢坡陁北城墩

城北有墩謝公墩

誰可作九

泉石頭控崢嶸目盡西南天定都記孔明赤壁方凱旋

孫權

定都孔明初勸之

惟初鼎足計用意良已度更作長干行秦淮亂

清漣殘春掃餘花密葉未有蟬高臺畧四遠綠野浮芊眠

午陰久未移幽景為我延使君固不凡况有嘉客先老大

百念息爨餘豈遺煙了知塵外心本自無間然

### 與惇立夜話有懷石林復用前韻

有山不能掃坐愧三十年

余營石林今幾三十年矣

冠服豈不營狙猿

強包纏惟餘緇衣心未敢忘賢賢他日得吾子匣藏駭龍

泉衰頽為興起此腸寧非天羯胡玩兵久亦悟終好旋扣

關復請吏搖尾志頗度休兵固有奇撫事猶涕漣投懷幸

傾瀉知子非寒蟬十日對榻語夜窓了無眠賈生侍宣室

趣席方招延願上治安策何者今當先我行返故廬跌坐

看爐烟功名會及時佇子論燕然



用前韻送惇立

畏作親友別况復非中年身如三眠蚕已老鬣自纏榻來  
守江關從事寧獨賢經年兩大入燿火通甘泉石林豈壺  
中亦自有一天采薇敢言勤誰與歌勞旋上書苦哀祈傾  
寫志已虔坐懷北山巖未見西溪漣人言搏風鵬不及翳  
葉蟬共挽攜手客可忘曲肱眠首鼠信禿翁胡為上遷延  
子來幸暖熱愧我一飯先論詩似鳴玉想見藍田煙索去  
何乃遽臨分重依然

為山亭晚卧

瘦石聊吾伴遙山更爾瞻泉聲分窅厯草色借廉纖玉粒  
時能飽霜毛日更添平生疎懶意况與病同兼

次韻方仁聲惠文編

他年落筆坐生風下舍諸郎敢長雄操縵不能陪衆手斷  
輪終自付良工鏡湖漫憶歸狂客漢上誰從過德公會向  
南溪尋舊約別開小徑共相通

戲方仁聲四絕句

戲弄扁舟泊定村却尋三徑築茅墩雲邊此意真誰解賸  
作新詩與細論

水檻新開似浣花傍溪須更作浮槎祇應屢費王宏酒時  
要清樽對落霞

不惜囊錢信手空荒田却擬望年豐天公可是憐風月判  
遣詩人一例窮

盧橘楊梅已及時我歸先自在前期平生不作宣明面浪  
愧將軍建鼓旗



仁聲舊居城東泊宅村張志和常所游也今徙西  
溪作雲茅菴因東崗為小亭號茅墩今欲溪開水  
檻久無資會郡守有饋之酒五十壺不敢飲亟易  
之乃克成有田數十畝常苦下潦余居石林與雲  
茅南北正相望故四章皆及之云

次韻馬參謀蔣山開堂飯素

邂逅聊憑法供真茲山誰謂我非鄰相追更喜同枝策得  
意遙知了斷輪幽事要須塵外侶好詩仍惜境中人歸來  
袖裏傳新句驚放巖花作小春

諸幕府見和復荅二首

一勺清甘寄悟真

八功德水在定林寺  
址宋舊名悟真寺

覺城東路更

鄰

臺傾劫火無遺燼

寺經兵火盡焚

地轉奔風有伏輪但遣籃輿從

來守深知幕府盡詩人登臨莫忘千秋意不必山陰記暮

春

欲眠遣客笑吾真愛酒空床羨汝鄰歸計甘從短帽倦

塗何止畏奔輪高車不用三千客淨社須期十八人尚許

一樽仍破戒黃柑催釀洞庭春

是日客會者二十餘人以齊集不置酒

次韻馬參謀新作山亭

家山千仞聳亭亭夢繞苕溪十里青苦厭簿書迷老景坐

懷丘壑寄頽齡稚川可復尋勾漏靈運能忘過水寧疊石

且從開小徑苦寒仍喜報餘馨天工未擬藏遺巧物態何

曾有遁形散策便思穿窈窕沉鈎真欲釣清冷已看袖裏

攜東海端向籬中得畫屏半世生涯皆福地不妨歸更侍

祠庭

余前後領營福明通洞霄官祠九  
任二十一年時方又上章乞歸



方叅議用前韻記嘗過余石林次韻答之

不復襄陽寫孟亭草齋人道是丹青那知客自從文舉但  
怪山能養伯齡世味無多真潦倒歸心欲寄每丁寧遙聞  
逕竹添新影更想巖花作遠馨夜鶴未應真怨別江鷗須  
信久忘形地偏故逐淵明遠風好常隨禦寇冷癡坐正憐  
塵滿案醉眠終倚石為屏瀛洲學士煩追賦尚記滄波接  
洞庭

卞山後即太湖正與

洞底東西兩山相望

徽宗皇帝輓歌詞五首

制作三王舊憂勤一紀餘豈惟成禮樂真欲混車書黼展  
猶丹陛聽輪忽紫虛帝鄉歸路穩無復故樓居  
帝業承瓜瓞天倫映棣華千年垂接統四海自為家畢郢  
終何恨蒼梧陟已賒廟塲驚指顧行路泣悲茄

脫屣初無戀遺弓故不忘金盃徒自聳玉椀且深藏付託

歸真主經營有舊章栢城森渭水空愧寢中郎

卜宅軒臺近因山禹穴深綴衣驚在匣黃屋本無心海濶

青雲隔天高白日沉秋風無馬跡惆悵屬車音

浴殿陪書詔甘泉忝侍臣虛傳遊帝所不復從時巡効死

終何日餘生漫此身攀髯知己矣揮涕灑江濱

哭趙叔問

劉氏盪石宗畧分天下半斯文獨更生落落分族冠探書  
到千古極意在理亂故宜蕭長倩憂國共長算我懷崇蘭  
君多學真一貫束髮踵癯儒長檠媚空案胷中行秘書領  
畧能默斷埋光久不暴玉石終自判中年立周行杞梓見  
脩幹雍容視出處未可亟招喚坐令護都水不時美先漢



荷囊侍丹宸正訝歸稍緩  
為棄天閑一往謝羈絆黃爐  
閉白玉萬事風雨散計來為失聲涕落傷老伴孰知錦囊  
心無復銀鈎腕柯山渺何許日月忽已換平生渾金質反  
覆要熟看寶琢寒泓誰撫遺玩尚有千字碑臨風寄

長嘆叔問三衢新居號崇蘭館字畫猶妙蓄硯甚富皆奇程致道作理銘敘其事甚詳

三餘集卷一

五言古詩

樂府雜擬

驚風吹鴻鵠一舉儀天衢勁翮自肅肅弱羽猶區區時於蒿艾  
間得力鳴相呼永愧燕雀情我豈不足歟鵬運與鷗沒遠近各  
有圖方當絕四海安敢懷此都

用意崎嶇外人貴真相知張耳望陳餘汲黯是魏其所謂刎頸  
交首身果不隨太行摧車險蜀道登天危坐席有畏塗方笑劍  
頭炊老翁齒牙脫年少莫相疑

古來達士志愛日懷兢慎皇皇百年心穆穆三才順後生不作  
意易名才慕藺感慨能幾何繁華終共盡不須吟梁父亦勿歌

宋 黃彥平





虞殞當從箠瓢人勇退以為進

往者東門瓜近接咸陽道炎風沉玉甃宿露薜瑤草召平磊落人此亦有何好常時玩釣帶不復嘆枯槁武陵桃易華角里芝難老戰爭茲云始賤貧儻長保

青青佳蔬色春事幽人家為政一畦足葱韭紛菁華貧士食有經願欲不得春鮮種二十七邊豆無添加寒翠濯露雨甘芳供齒牙菜花亦不惡何獨愛桃花

忘機對芳草一目青浮浮榮枯四時行寂寞萬事休樹諼見國風采菊聞靈修空殘非蓬首詎返王孫遊韓子木強人臭味誰敢投暮年還小黠不肯辯薰蕕

修竹不受暑飄然無定著炯炯月明枝蕭蕭風墮籜佳人洞天曉羞多頰怒薄玉雪生林際紺袖花零落塵埃襍穢子執熱何由濯亦復起遐瞻層冰架松壑

石戴古車轍人生來往勁雙輪不生角越絕會通秦坐令邱壑姿化作京洛塵君看釣魚磯鼻口羅江津浮走例有役俛仰俱已陳吾亦永愧爾東西南北人

神物有顯晦飛潛不同羣為核蓄雷電為劍動祥氛魚服與蛇行委蛇顯其文嗜慾未可求物象疇能分一朝遊不留萬里垂天雲回首視山澤凡鱗故紛紛

遺堞感至今平生行樂處英雄除霸王俯仰成今古昔日城中居此日城邊墓魚龍與爵馬共盡誰能數悲風天末起陌上行人去淒涼王仲宣獨詠登樓賦

元符己卯冬至先君罷興國令宿皇恐灘有詩云倦客逢長至扁舟泊遠灘居常暗寐冥童稚笑相歡後十七年自



成均謁告還鄉是夕公幹宿新淦寺有感賦此

去年度長淮霜月照孤驛今年適異縣香霧依禪寂人生幾冬  
至南北均行役風枝無停號遺句誦悽惻生男當門戶墮地要  
膂力撫我謂我臧誨我以文術寧知事大謬木拱玄尚白百巧  
換千窮只有不如昔曉燈離室暗又踏宅山碧行行重行行風  
塵兒亦得

獨秀峯

湘山富佳色韞蓄人未知天球有餘潤草木蒙其私聯綿固不  
惡峭獨者愈奇茲峯豈飛來興盡留於斯雲烟恹么麼灌莽紛  
離披名雖異星渚實不媿仇池惜無小白花蜜雪蒙疎枝教僧  
營小築便是補陀祠

送徐稚山江西漕

長江分東西下流隔滄楚方船漕紅粟出節湏調護催科急星  
火踏浪輕塵土公私此一時長短要相補水生春岸濶江淨桃  
花吐餞宴那得頻征帆會當舉烟鬢小姑山曉鏡女兒浦雁雁  
破行飛鴨鴨避人語平生釣竿手只合江湖去因君偶別離感  
我猶羈旅

趙少隱移漕廣東

五嶺餘炎蒸三湘漫清絕犬牙地相入要是俱百粵趙侯干莫  
器盤錯中排決近推高帝孫遠付使者節悠悠南海路惘惘春  
陵別君才誰得如郎星映卿月功名與事業邂逅當俯拾姑行  
毋疾驅遲補中都關

題劉氏市隱亭

雲合日景暮鳥啼芳意休閒芳闕佳境倦客得深投主人定何



人方技家者流持廉不二價博物要兼收丹砂出勾漏杜若來  
芳洲盧橘上林夏桂叢小山秋魚蟲儻適用剝啄無虛求潛山  
仕途捷隱居吾廬幽喧寂若兩忘容膝萬事周佳名志華屋他  
日或重遊

七言古詩

趙丞相黃岡獨往亭

士生涉道有深淺時來行身隨近遠飛雲邂逅作霖雨雨足雲  
歸自舒卷南陽躬耕心不悔東山忽起顏猶腴威行中慚喜折  
屐得倍古人謀蓋鮮楊顛慟哭野王第歎息成言那及踐關中  
丞相富邱壑掩鼻功名聊不免前年一戰靖江潁今年再戰開  
淮甸心期綠野園林勝夢想黃岡松檜晚淵明孤往欲問津赤  
松從遊非衆願憑虛或喜凌雲賦遠遊請續離騷傳

彭澤懷古

人言寧飲建業水陶公不污彭澤米淳耀之列當未渝義熙之  
政何如此不能先驅淨蛟蟻忍傍車輪攀獺尾已荒松菊賦歸  
來頗著文章申已志少題正朔多歲時此志會須來者知羲皇  
上人樂復樂晉室遺民悲復悲

五秋日湘舍熊生所居廡地得劍長三尺六寸熊生自言  
居六世矣感延平舊事因系以詩

野人廡地得神兵鏹采埋光三尺半念求疑識推甲乙櫛具連  
環既燕漫里閭只從曾高說棟宇未隨兒子換訖今要是二百  
年前此快藏那得箕秋風是日來閭闔利器乘時思擊斷肯論  
口腹車魚間未露文章斗牛畔良工拂拭勞三浴志士提攜思  
一旦張雷博識固自佳賈郭充庭還可歎北岸華陰土性弱顏



色暫時供把玩不如一洗清海水徑斬長鯨為萬段

二妃廟

舜生諸馮沒負夏南游晚莖蒼梧野九峯中隱土一坏草樹蒼  
茫誰辨者皇英不祔只孤墳妃祠別占清湘原畧無石馬充故  
物但有叢筠志淚痕山川相遠終相望衣冠來游環佩響風急  
真成鶴羽飛波寒不隔龍工往鮫室何人相與居月明警蹕萬  
靈趨未論甄后拾翠羽定見李白騎鯨魚

程伯禹給事供職維揚不及迎侍通直丈生辰欲寄壽星  
未獲方深念不憚有叩門求售者既得之自贖其異且求

詩

將軍精忠石飲羽志士純孝冰出魚天公曉人極了了間遺異  
物供時須西清侍講廣陵居壽親千里愁作書平明剝啄出見  
客帝俾遺汝明星圖仙官遊空貌不懼若木映日華不枯勿嫌  
龜鶴有皂白相汝絲服為親娛嗟君密行不可誣塞侯周叔俱  
不如帥先百僚待忠孝佇相明主平羌維

五峯竹

此君抱節懷霜露裁以廣寒修月斧區區拔穎陋管城落落中  
繩宜冊府潛心幾絕西門佩隸古親傳伏生語後來頡頏追時  
好客鄉子墨先生楮慈恩柿葉剝谿藤俗嗜紛紛那足數何人  
喜事翻新製林下風流徵近古宣心寫面却緘囊百草千葩增  
媚媼青奴小忍供筆硯晴窓示爾梅花賦

送胡帥

征南下車再寒暑比屋罷民手摩撫使渠安業不擾渠恐負來  
時天上語漢官題名當家譜向來諸公孰為伍天下中庸有胡



公不畏彊禦陳仲舉年時丞相雙旌舉南浦飛雲作霖雨文昌  
戎政念得人誰令兩公歸接武周宣中興籍方虎秦王學士開  
天府只今陛下更苦辛要折遐衝付尊俎忍饑種麥未蓋土軍  
民嗷嗷兩難處從容宮漏未遽移亦及漁樵人物否

驟雨宿香步

阿香被召雷扶輶飛廉受職雲承宇冥官鬼伯俱奔走東風作  
惡神靈兩山長已自疲犖确泥深况復愁沮洳夜投古寺亟燎  
衣燈燭熒煌湯漏具移床避漏皆相似欲往華昏仍齟齬曲肱  
勦黠初未遑蓐食還須戒徒御長年行役難勞事勝日登臨或  
相補會到諸峯最上頭俯看萬壑爭流處

三餘集卷二

宋 黃彥平 著

五言律詩

田家春日二首

緯竹梁溪面誅茅舍道傍臘收冰下紙春課社前薑露草牛羊  
長風花杖屨香人生皆若此官獨為誰忙  
遲日芳艸草微風被野田荒山有吠犬窮屋亦炊烟花已清明  
近茶將穀雨前供輸了官事麤糲任吾年

石祈晚泊

江樹繁陰合江流漲沫渾歸舟帶圓月倚棹並衡門表表浮屠  
迴連睥睨昏梅花騰遠響楊柳想新翻

臨川投贈



主計懷蕭相臨民起次公履聲元自識環賜固宜蒙便覺長安  
近寧論茂苑雄別詩無好語虛忝薦賢中黃嗣

翰林逼華蓋天策視瀛州哀痛扶輿運從容贊廟謀終篇常稱

愜兩郡却淹留更試平原爾方看相且侯汪彥章

今代昌黎伯琳宮尚陸沉極知延閣峻仍記掖垣深簡古元和

樣精微正始音居然合廊廟過聽著山林韓子

發策魁丹陛摛文重禁林麒麟鞭縷玉齒齒燭搖金事與京塵

改愁將瘴髮侵東環應晚合未用歎升沉莫壽朋

大通鋪

寒食底數日春光猶一分風烟明杲杲鶯蝶鬧紛紛館地紅鋪

繡汀洲綠如裙芳馨有誰遺吾欲降東君

還自豫章寄謝胡帥承公

陸贄揮毫敏庶頗仗鉞頻人言綏遠俗吾念隔中宸虎落新軍

睦雞翹舊望親玉堂清夜直學士固應真

文獻尊皇祖樞機屬老臣中庸鎮弟夏精祲極天人嗣武躬戎

服邊頭亦戰塵毋云予小子家國待經論

翰墨南州士弓刀北府兵幾年聞戰伐兩地費經營信父吳兒

笑儒冠武弁輕人才廣收拾歸共致升平侍郎前守鎮江

誤解陳蕃榻慙升賈誼堂絲論今典誥鐘鉉古銘章窺豹迷深

隱攀龍謾激昂昂梅同臭味妙語更難忘

胡帥見和用韻再寄

本朝求治切大府課功頻葵藿長傾日槐楓遠被宸深心憐父

老慈訓念君親奉計他時事仍看漢相真

喬木猶春色名家亦世臣安危思有寄文武不無人翰墨昭前



烈功勳踵後塵八蕭終鼎萬二賈且絲綸  
國步誰為梗民生乃見兵選賢丞相府披節伏波營健筆千鈞  
重先鋒一鳥輕征南多興緒相憶暮雲平  
挾書游北闕發策列東堂遽駭豺狼怒因潛虎豹章已應長寂  
寞無復變軒昂公若登台輔平生或不忘

冬至節假賦愁陰喜霽

爰日明朝至寒雲此夕同預知鴟啄雪先驗烏呼風鄉國追隨  
外年華感嘆中清愁將濁酒斟酌併成空  
日出湖山麗寒綃草樹芳裙腰先蕙碧粧頰次梅黃日極綿綿  
道心清細細香南枝春不淺東閣興難忘

石埭道中

地勢方呈險溪流不得平濤頭開沸白石齒聚寒清納納三江  
暮油油萬壑傾澄清渾莫測仄默諒無聲

弱水

弱水三萬里仇池十九泉頗疑仙境界不隔世山川海濶雖無  
地壺深別有天因何霜雪後一壑獨蒼然

次韻朱希真贈別

白頭纔半刺黃卷謾三餘髮禿絲難理詩工錦不如登山靈運  
履下澤少游車子念從吾隱吾能授子書  
偶伴浮雲出還尋倦翼歸沂流扶楚旆長夏及荆扉故國荒喬  
木勞歌厭采薇本非求獨往要自隔羣飛

歲晚楚亭集唐句

百丈牽江色連檣並米船樵蘇喧晚渡鷗鷺浴晴天問舍慙元  
德登樓憶仲宣司存兼吏隱別有一山川



輦路生春草雲安有杜鵑羈棲投老日邂逅中興年紀鳳初元  
通遷鶯雪齊景鮮愁寬卑濕地欣對艷陽天

故人亭

寒裏花開晚霜餘落葉深雲天迷遠望山水費登臨瑟鼓英皇  
怨沙沈屈賈心高名前後事苦調短長吟

宿新喻縣戲為俳體

短短長長柳疎疎密密杉秧深先熟稻葉貴再眠蠶禦暑烏油  
傘傷春白紵衫鄉風儘江右魂夢莫湘南

妙音方丈

彌勒同龕夕維摩示病情壚殘文武火燈暗短長樂耿介游良  
苦溫柔夢不成顰眉桃錦字相憶恨高城

感事寄懷王彥舟侍郎蘇景謨大夫

蔗葦年仍惡研桑命亦薇原頭買茶去江口換魚歸願影行猶  
畏全生計已非五陵遊俠客裘馬本輕肥

絕壑慚懷寶清時自貢珍光芒殿地發斤斧響山臻經畫煩才  
吏餘羸速細民尚應來漢使金碧儻龍神

燕市人初去遼城鶴共飛兵戈雖向息閭井已云非險阻千山  
路艱難百口歸扶携兼老幼吾見亦依依

明月人千里青陽歲又除曲江行有債幸舍出無輿細寫蠅頭  
字遙看雁足書長江不可屬幽意若為攄

泊舟兜率寺呈王承可

檣燕驚三疊刀魚送兩旗雨籬花淡泊風岸柳參差晚並知名  
寺同尋沒字碑摩挲幾來者沿泝總何之

龍用中宵壯風揚廣岸波不堪遙駕鷺合作傍龜鼉窅窅靈妃



瑟滔滔孺子歌微君澄練手如我布帆何

王子才軍中有道人鬻筆既售而去笑曰吾姓名在管中破視有細字曰李洞長求之不復見矣

車馬相逢地龍蛇雜處中從容李洞長遊戲管城公墮履方圯下跳壺已闕風還同賀水部乘輿看行宮

南歸宿西禪寺

靈輒三年宦何蕃間歲歸風塵為吏苦天地稟生微廩粟難餬口園蔬亦樂饑誰令浪奔走南北獎征衣

送黃司錄

異縣傷流落同官及老成詩書尚家法譜系更宗盟歲暮一樽酒陽春千里行雙星定何處撫字振新聲

雪消南國瘴花偏北枝梅華髮天邊老微陽樹底回未知身外事聊覆掌中杯檢點尊前客明年幾去來

七言律詩

池州府石埭縣

腰輿徑度遠人村猿鳥聲中日易昏山合翠屏迷出入路隨流水聽潺湲駕崖鑿壁花無主洗雨梳風暖自繁只欠相逢具雞黍便從人說到桃源

約建德蔡令游梅山晨起微雪

長年蹤跡困塵埃幾向名山勒駕回閑約訪僧尋野寺翻成踏雪看官梅岫雲要是無心出溪月猶能有興來竹折松欹更愁絕不妨吟賞助清哀

青回沙際草先知稍旁芳林上故枝野寺殘僧微雪後凍雲寒雁共來時不愁眼裏無詩本却要胸中有畫師已拚入城官長



罵留連風物得歸遲

吳虎臣獻書行闕

山北山南烟靄橫破烟啼鳥已催耕能來夜雨連床語大似春  
風不世情琳館陸沉吾已去金門寵辱子方驚集賢學士應相  
謂詩客形容大瘦生

聖節有感

謾說南風入舜絃傷時撫事益悽然暗暗新綠愁鴿鴒悄悄殘  
紅拜杜鵑心折更聞胡部曲眼明那復御爐烟蒜山瓜步江南  
北寶鑑經囊若箇邊

己酉人日

寒梢發穎斗臨寅玉燭初調七日春稍稍江雲欲回雁醺醺花  
發已撩人敵來莫道長安近老去空驚甲子頻南渡諸君且書

劍北宸雙闕正風塵

送楊當時夢漕

桃花浪穩布帆張溪節新除蜀郡郎自惜儒林無別墨只今文  
苑有他楊碧雞回谷光靈遠白狗稠灘道路長亦郎潛歸未得  
故今幽夢炯鷗行

丁未南徐燈夕

王正三五謾佳節濁酒寒燈且眼前無復鼓歌祠太一真成烽  
火照甘泉踈梅歌雪遙相憶淡月朧雲也自圓北極朝庭知不  
改起占天步亦茫然

重過京口

江北江南形勝地憶傷遊子少年心波分楊柳愁邊碧丹帶蒼  
薇笑裡陰鐵甕只今雖料理金山久已罷登臨寄聲瘞鶴巖頭



字莫厭龍蛇萬里深

宿東流縣威神寺

雪梅風柳破韶光又撲征塵宿淨坊壞壁老師真數面隔年題  
字故斜行王春三月向人好禪誦六時銷日長來往區區祇如  
此桃花應亦笑劉郎

讀邵報有感

江城留滯髮毛斑六縣三年幾往還遷客東流驚建德懷人秋  
浦更齊山平生深愧田園志陳迹真成俛仰間同學少年都上  
道欲將長鋏向誰彈

曉發東流如建德途中作

聽風聽水東流寺為雨為雲建德山拍枕波聲猶在耳參天秀  
色不違顏春來草草纔正月柳內時時見一斑蒼白工夫渾未  
有藁砧行李已來還

送何端卿帥瀘

何侯石友平生事傅粉風流詎可同誰使擁旌三峽外不留持  
橐五雲中啼猿此去欺殘月回雁因來託便風亦念人生行樂  
爾且拈重碧摩輕紅

人物當年盛學宮笑談嘗許小人同分襟短艇江湖去回首觚  
稜涕淚中却叙簷花聽夜雨又還菰米動秋風祇應黃屋收京  
了邂逅東華踏軟紅

三月十三日步至杏亭

禪房幽討有誰期竹徑穿花蝶不知山擁暮寒斜照裏樹舍芳  
思欲開時和風第放千林喜勝日閑成一段奇何必紅塵汚人  
後始從簫鼓看繁枝



五言排律

南部

南部風流志東山窈窕容詩牋元擘彩史筆近書彤花月妖時  
見閨房美間鍾夢蘭宵有證吞藻露添濃稍訝釵分髻還憐鏡  
隱胸吹簫儀彩鳳遺策駐游龍曾是雲間墮真成月下逢光風  
開豈寇細履上芙蓉湘岸傳虛瑟昆廷學晚鐘瓌姿隨月滿綺  
思滯春慵亂絮飛何遠繁花影自重紅裳明洛浦白雨濕巫峰  
織女期清漢宜男結綠茸丹書多避忌銀葉竟怔忡每遂西瑤  
宴長防北斗春屏深金屈戌珮響玉玲瓏閱古柔情極細書逸  
興濃燭還通德待研有雪兒供

按此詩疑非完篇

七言絕句

田間春晚

麥苗初種今如許少日行遮稚子班看舞翠綃三百頃却須花  
絮了春間

淺白深紅小睡餘夢殘春去綠扶疎更無蜂蝶憐膏馥時有嬌  
鶯隱自呼

清溪解纜用秀才甫韻寄杜藏用

九華晴雲今日陰清溪漲水夜來深蒼梧哀泛瀟妃瑟白籀秀  
出垣娥簪

長年三光占嶰筒笑語天回西北風高城遂隔不足道只憶齊  
山幽桂叢

宿坡書事

泱泱沙泉取次流小堤間貯一奩秋莫將霞鷺飛飛影認作蘭  
成萬斛愁



擬裁垂柳待棲烏  
招買風光計已疎  
只有碧蘆馴白鳥  
繫愁縈恨不關渠

歡喜口號

紛紛番偽謾成羣  
淮北淮南結塞氛  
破走仙官三萬騎  
祇煩前隊夜叉軍

殘寇遊魂讐復猜  
焚舟棄甲總頭回  
天家會遣楊無敵  
磨斧銜枚夜半來

愁見淮陰打陣來  
白氈玄甲倒如摧  
山東降虜時時說  
說道番人怕背嵬

從來漢將說張韓  
泗水流澌浴鐵寒  
待沂隋河趨洛口  
却登灞岸復長安

占著商山接華山  
兩京渾在笑談間  
樵蘇按堵人甘寢  
別隊官軍入武關

蜀茶互市入西番  
番馬來嘶渭水寒  
為報堯峯吳少保  
徑招屬戶會長安

何必翠虛捐魍魎  
且看白旆掛麟視  
幾年待著龍蛇歲  
便是乾坤交泰時

侍臣祇道天顏喜  
掩骼還俘更苦心  
邊戍要教迎刃解  
聖恩先作漏泉深

初到石池沿檄阻風麻步

悲風林際萬牛聞  
驚浪江間百馬奔  
舟歸拍點淮南岸  
桅折船漂何處村

貴池魚味不復美  
秋浦猿聲自昔哀  
南人官此欲歸去  
為問北人來不來



石鐘寺

秀發翠華晴景推顏五老蒼顏暮雨朝雲佳處小姑依約烟鬟  
朔風驅水作狂瀾眼裏廬山脚到難少待須臾莫倉卒卸帆聊  
憇石鐘山

宿香巖寺

章原暝邊龍會宿塔嶺尖處胡孫愁且並山腰歌側過莫從高  
頂望神州

天生忠孝程伯禹國有老成黃嗣深山北山南時一過閑雲野  
鶴故人心

歸途次韻

霏紅點點胭脂雨唾碧濺濺菴畫溪送客歸來問山館一聲啼  
鳥日平西

村落人家柳過墻舞腰曾共小姑長點教拂黛留相學卷葉吹  
蘆莫漫狂

寒食猶須數日間楚亭才隔幾重山歸時便有桃花否試摩挲  
牋問曲欄

隔年重到洛溪路旌旗行跡髮雪添幸有江山供吊屈愧無書  
舊詠來廬

春風喬木洛溪寺煎點溪流問故家庭下已無書帶草步頭猶  
有水仙花

湘桃亦作春風面與我中原淚眼看舊染天香悲麥秀續書王  
夢失槐安

巫山生女不必醜湘樹開花也自紅為問黃塵奉嬌子何如青  
歲嫁東風



楚山雲日畫昏昏歎息皇妃尚有村鼓瑟聽渠悲帝子凭肩那  
得學天孫

逢人怕作宣明面為米誤折淵明腰光陰客裏深相憶泉石家  
山特見招

剩水殘山明竹屋暖風晴日倩桃花輕羅小扇親曾見花外青  
帘是酒家

清明詩

去國戾戾悲往事還鄉茹鼓愧前修十年過計千章木一寸離  
心萬斛愁

默成集

鄭亨仲作亭西山顏曰可友以書求詩為賦

宋 潘良貴撰

即北山忠愍公字

君不見子猷嗜好與俗殊種竹不可一日無又不見太白  
清狂世絕倫舉杯邀月獨相親風流二子去已遠塵埃那  
復聞高人鄭侯未遇身更閒躬耕自樂巖谷間開亭容膝  
日寄傲坐對嶠嶢崒嶂之西山西山蒼翠如堆玉松奏笙  
竽雲作屋澄鮮爽氣日夕佳不學時情易翻覆田文唾面  
嗔小兒翟公署門良可唾悠悠權利悲一時樂哉此友誰  
能知鄭侯與我論心久年少相從今白首對山勿著絕交  
書要須着我成三友



夜坐聞竹聲示姪

室明窻有燈夜暗天無月跌坐依蒲團竹聲助清絕初疑  
小雨至蕭蕭俄優歇忽然變軒昂風湍散巖穴聽久耳根  
靜萬慮皆瑩徹塵凡不待掃境妙心自潔竒哉不二門欲  
倩維摩說

和季成弟中秋不見月時寓妙智山中

經年等待中秋月一夕陰雲掃不開高樹時驚踈雨過空  
山那復故人來夢回誰憶霓裳戲老去愁聞水調哀與子  
相逢長得醉何須佳節始啣杯

朱教授見寄七言二首遂用其韻

賢哉遽瑗晚知非此道吾今亦庶幾囊乏一錢聊自哂家  
無三徑不妨歸冥鴻久已離矰繳野馬由來見鞿韉溪上

月明船正穩肯將簪笏換蓑衣

等閒長嘯倚孤松雲破天邊見碧峯架上殘書猶可讀瓶  
中儲粟不堪春生涯幸有千年秀身世何須萬戶封僧榻  
寄眠無一事覺來深省聽晨鐘

僕讀沈約傳怒其緩頰賣國髮上衝冠然古今人每  
壯其東陽八篇文辭未有少之者因次卿登樓新什  
輒效立春體制和且攄所懷云

隱侯文治知何用千古端羞墮淚碑國危忍助神鼎覆身  
免猶嗟革帶移登覽寒烟縈遠目淒涼夕照謝高棟傷心  
往事君須賦恐有道人來采詩

夏日四絕

四月天氣初鬱蒸碧桐照空門巷清何人解助隱居樂為



我喚取黃鸝鳴

掃地焚香避濕蒸  
睡餘茶孰碾  
聲清風來桐竹  
傲傲舞雨  
過塔除灑灑鳴

錯落星河天未明  
太虛涵露氣全清  
東方隱約生光曜  
便覺林間宿鳥驚

娟娟踈竹拂雲長  
門巷無塵氣自涼  
多病無情如嚼蠟  
卧看風篆博山香

夜與仲嚴叔倚季成三弟同坐聞笛各賦一絕

西北干戈撥不開  
今宵聞笛更清哀  
高堂親老髮垂白  
與子買舟歸去來

法清晚步分韻得夕字

有生能幾何  
避亂不謀夕  
聯翩二三子  
晚步縱所適  
田野無人聲  
牛羊斷歸迹  
時看墟曲中  
寒烟裊修碧  
雖南飛雁北信  
杳難覓  
不知二聖君  
泣然淚沾臆  
小臣真蟻蝨  
持顛願何力  
殘臘行當除  
青陽來已逼  
衰骸分填壑  
公輩宜強食

贈方仁聲

公吾里人  
客寓吳興  
神情散朗如晉宋間高士  
晚得官無仕進意  
築庵西溪  
名曰雲茅  
以衛生養性為事  
詩文雄深雅健  
追古作者云

學道悠悠未見功  
敢言凡質有仙風  
他年一鉢江湖去  
先向茗溪訪葛洪

和沈秀才

年來有客從黃石  
老去何心望紫泥  
世事違人常八九  
生



涯隨力任東西

軟語平時芻豢美苦言投俗桂薑辛山河若欲據幽憤盥手焚香讀過秦

弱齡慮事心常破壯歲投閒鬢已華但得安平貧如北阮何妨受侮似東家

和三二兄西莊書懷

莫問莊生然不然時中只可自隨緣冬深江北無邊報又得安貧過一年

賢愚在聖等為人要是天君自策勲舉世紛紛誰得妙韓公惟許孟軻醇

古來達士盡窮空我愧修身道未豐痛飲不妨歌楚些投閒何幸伴吳儂

一炷清香度博山妙觀不着有無間此心欲報難論價放我形骸十載閒

和仲嚴弟莫春二絕

吾生四十已侵尋獨喜年來不動心世事升沉君會否人間春去落花深

沂上風光點獨知樂然寧復歎春移吾人老大知何用仰止前賢須及時

梅花

天與孤高花獨新世間草木信非倫影涵水月不受彩氣傲冰霜何待春冷淡自能驅俗客風騷端合付幽人往來百匝堦除裡頓使心無一點塵

氣欲崢嶸歲欲新寒梅方信冠群倫直能平地凌封雪可



是回根迎小春九畹蕙蘭真上客千桃李盡庸人即今  
攜酒江郊去弄蕊攀條一拂塵

雪中偶成

飛花看六出俄向臘中來解驗人情喜始知天意  
闌夜闌  
牕愈白晚凍日難開  
交熟何時節飢民正可哀

二

歎歲多流冗邦侯喜鄧來雪除驚臘盡耕近樂春回郊野  
猶同色江天已半開短衣難揜脛誰說少陵哀

滿庭芳

夾水松篁一天風露覺來身在扁舟桂花當午雲捲素光  
流起傍蓬窓危坐飄然竟欲到瀛州人世那知此夜空際  
列瓊樓  
休休閒最好十年歸夢兩眼鄉愁謾贏得蕭蕭

華髮盈頭往事不須追諫從今去拂袖何求一樽餘酒持  
杯顧影起舞自相酬

挽陳德固守禦

勅敵登城日中華將士奔人皆趨北闕君獨死南門秘計  
無人用英聲有史存秋原悲淚落桂酒與招魂



北海集卷之一

宋 綦宗禮

古體詩

次韻德升尚書永慶閣後觀梅之作

託根層石下 閔艷重檐陰  
愛日少回照 淑氣潛相尋  
入牖暗香上 俯欄重蕊深  
孤絕迥多態 繁穠徒滿林  
恠君獨吟賞 却酒不為斟  
應曾共花約 遂擬合朋簪  
雪意殊未已 寒英虞見侵  
聞花正芬馥 相向一披襟

次韻國佐侍郎即事

雪霽春未和 寒雲慘多陰  
同鄉有期約 學海慵沿尋  
吾衰今得友 晚交契則深  
歲寒見松柏 茂悅依同林  
倚市人所賤 在山泉可斟  
蟠桃著實遲 勸我簡蒿簪  
吟窻擁翠娥 分



定那得侵愧笑領君意取酒開胸襟

次韻國佐二詩

羈旅念鄉縣衰遲驚歲陰交朋尉幽獨詩酒相追尋求盟  
敵難弭助順天意深邊書息障候喜氣到山林聯裾得良  
會舉白毋緩斟話舊誼笑語拚醉歌冠簪梁塵歌響墮玉  
頰酒紅侵殷勤捧杯意不惜汚羅襟

官閒一何幸安坐閱光陰世事來無端循環那可尋名高  
毀易至官達憂常深豈敢慕華屋且願依中林主人真好  
客置酒每共斟里仁知有托計決擬投簪樂飲不泰至歸  
夜從深侵梅英苦留戀着人香滿襟

再賦一首起韻信筆初無定意也

妍詞少勁氣直表無曲陰勸百豈救一枉尺焉取尋世路  
務爭險人情難測深漁樵各有侶英俊自成林藥苦病所  
利酒多狂莫斟殊投防按劍玉折戒磨簪願持松柏操甘  
受雪霰侵逢窮但回步何用涕沾襟

再次前韻

笙簧樂富貴等是老墻陰汲汲不知止悠悠何處尋所嗟  
天賦薄未報國恩深一夢遊帝闕九年辭禁林官廩尚可  
飽村醪時自斟不嫌泥土足懶拂塵埃簪窮巷春雪霽寒  
檐朝日侵意行何所適還欲訪同襟

德升尚書出示歲除用韋蘇州韻前後二篇及兩郎  
屬和粲然盈軸賞歎之餘有感於中亦輒次韻書山

居一時事

寒宵送徂歲青燈照華髮天時自代謝人事更治忽聖朝



今中興正朔幾書月未作故鄉歸又見新花發稚女巧娛  
予剪綵粧風物一醜婪尾觴顏然百憂歇

兒童喜時節老大悲齒髮流光難把玩百年如倏忽夜燈  
猶故歲晨燎已端月回首名宦途常虞駭機發今來對青  
山安坐見春物得失孰多少且使寸心歇

奉祀

八座近黃扉三公宜黑髮用舍豈自謀機緘何翁忽一麾  
遽出守雙溪厭風月江海今就閒議論猶英發大厦終須  
材虛舟聊應物勝覽莫辭頻君騶寧久歇

自述

箕囊紹弓冶不絕僅如髮遇主當艱虞持身敢怠忽謬隨  
供奉班更直淹歲月出領東諸侯羽書憂調發丘壑從素

心朝廷憐舊物桑榆不自收我駕將焉歇

和東園黃香梅之作因復勸遊

寒梅殘幾枝插花無點髮僧房不得地飄零人所忽谿風  
晚來急尋香堆碎月不斜東城春嬌黃方秀發新詩寓佳  
賞留情寧一物芳卉滿春山籃輿來莫歇

和李元叔秋懷

移居寄城郭閒如在郊垞百卉暮凋翠兩山常對青兒童  
漸吳語氣俗易薰蒸喜聞淮師捷神武暢威稜叛寇不足  
滅四夷其來庭十年亂離厄永夜鄉關情庶見邱墓邦敢  
貪簪紱榮故人致尺素笑烹雙鯉膾清切哦十詠飄零乖  
一觥歲晚良可會濟世須時英

杜門身塊坐息念心灰死香火遠詞庭文書淨惚几治劇



力豈任投閑計良是深漸未報恩尚費官倉米吾儕晚聞  
道錯以名為市那知標榜著便有謗尤起如君取已多蚤  
合登貴仕況彼青箱業家聲在人耳草草脫冠重升未應  
止但願毋近名嘉言終合指

送濰州詹倅

音五

矯矯摩天姿青雲久垂翹別乘屈王祥海隅賴康濟峻節  
回郡政深仁賑民匱胡不三年留期民且安慰  
天子有使指借問何官曹轉粟沂洛津帆檣連萬艘大臣  
進所知得此千人豪扶搖一借便看上青雲高  
東風催去旆南浦傷離情攀轅何紛紛曉日來傾城中有  
韋布士雪涕揮縱橫欲何為者為言門上生  
先達收人材輕重在題目我出一何幸青眼深回矚聲名

士所貴推挽亦已足毋老憐我貧家事猶省錄  
人生樂知己見遇況國士吾身不激昂孰為報恩子薦達  
有往來登門願誰始寄謝魏王孫丹心亦如此

蒙成大亨分送紫蘇且以前書有戲語垂示解嘲輒  
次元韻

先生昔為吏敏政便劇繁利刃無錯節大邑如烹鮮民曹  
與廷尉衆紛常裕然胡為棄九卿歲晚來灌園分陰在所  
惜寸地不忍閑草木苟有用豈憚遠移根從來憂世心中  
懷百慮煎栽梅期鼎寶無取寒花妍植竹待威鳳肯羨冥  
鴻騫此志未云遂亦足留風烟山泉釀賢聖艷曲聽嬋娟  
引酌梅竹下醉卧雲峯前何以解其醒玉笋捧甌圓香泛  
紫蘇飲醒心清可憐洗滌麤蘖昏還觀神明全先生得此



物手種當春天耘培供採掇內熟常得痊云何失滋茂無  
乃人力愆因疑課督功多稼移大田循例猶見分乞隣閭  
東阡不耐作戲語解嘲來巨篇殊玉隱光彩入城驚市塵  
風霜已落木洞戶宜垂氈何當擁爐夜一樽同笑言

次韻成季尚書喜雪

衰年憂患百侵凌宵次聊憑詩灑雪寄情山水時自娛不  
求賞音絃莫絕身顯豈忘莊鳥吟量能盡止師周任閨中  
之趣難具陳赤城慵卧七回春終南捷徑猶可疑海濱老  
矣誰見稱積雪加寒固應爾且為北人湯餅喜

用晦顯謨近出長篇德升尚書遂已賡和輒牽鄙思  
以繼二公之後兼問行之待制

赤城自昔佳山水遊宦何曾論道里竭來五載著閑身天

假衰年幸如此偶逢人面即成親信美那知非我里相從  
晚得世家賢風流未泯典刑全豫章杞梓雜蘭玉向來人  
物常推先一門卿相有三四功名並列青瑤鐫憔悴祇今  
餘此老北闕荐書誰復草忘懷驟喜肝膽傾學道故宜容  
鬢好江湖歷走到海濱可怕鯨波風浩浩平時所寶非瓊  
瑰生涯都付餅與壘客至輒留盡歡適玉山不覺歆崔嵬  
醒來默坐參佛祖餘醒宿障隨驅排衡門我亦棲遲久却  
視華途漸俊茂山中麋鹿會同羣客裏妻奴得相守感君  
向我意甚真杯酒招邀惟恐後往還況此足親知清談雅  
集每忘疲尚書舊信心如水京兆猶傳政不私共尋泉石  
豈無伴却上雲霄知有基顧我終焉奚所欲一丘一壑志  
願足勝遊非遠閑日多秋節正涼新酒熟東州西縣君何



求請解行包停去躅

今體詩

故李察院挽歌辭二首

學古方從事投閒遂屏居聲華芸省舊風采柏臺餘黃壤  
歸何速青雲志莫舒推財均室盡遺子有家書  
有才曾少試無命可深尤憲書初我多滄溟遽狎鷗成年  
嗟未老多病忽先秋勤學平生事萱堂孰解憂

和人見寄

江海同為客山林不並居經時占喜鵲今日剖雙魚擁鼻  
還成詠撐腸未廢孤孤吟聊自遣誰復借吹噓

故丞相高平范公挽歌辭三首

遇主方英妙當朝獨老成小車何老老前席起公卿感會

真千載哀榮止半生傷心理玉處愁霧鎖佳城  
帷幄言猶在山林迹已遷登庸疑早貴福艾久長年渾厚  
風神粹恢宏德度全直應天奪速何物恨為肩  
憶昔金鑿直天顏喜色新草麻慚大手命相得良臣內賜  
克懷袖廷馭聳搢紳祗今餘典冊那復見斯人

故丞相呂成公挽歌詩辭五首

翊戴興炎祚權宜倣晉都關中蕭相國江左管夷吾感會  
逢英主拘攣鄙腐儒人間留不得去與列星俱  
憶昨初南渡人情正自危起平王室亂笑指楚囚悲投筮  
來方銳乘桴計不疑還師期滅敵遺恨失斯時  
仗鉞除君側披荆立本朝規模收廟勝威略動天驕賢業  
留黃閣閑情在午橋傷心桃李徑霜霰日蕭條



名與功高大身為世重輕初傳都督令已懾敵人情門謝  
三千客曾包十萬兵聖王分陝意歎息失長城  
蹙蹙成何算堂堂亦已休嗟聞閉東閣忍復過西州會送  
宜千乘歸藏但一丘往來埋玉恨清淚漲溪流

扈從書事

扈從官班近艱難報效微又同陪法駕復共着征衣舉目  
江好山傷心井社非何成戎馬定却作故鄉歸負郭田園  
美迎霜雉兔肥風塵嗟涸洞夢寐悵依稀聖主興皇祚羣  
公翊政機時當平自刻還採故山薇

入雁蕩山

傑峰秀嶺競崔巍緩引藍舁不用催一徑靈虛飛鳥上四  
圍春色畫屏開鹿門未有携家便雁蕩何妨築室來已上

封章乞閑散勿令俗駕却輕迴

德升勸酒為已懋尚書壽予即席賦長句以代俳諧  
禁掖東西曾並直鑿坡先後亦聯名那知白髮歸田舍却  
見朱轡蒞海城往事回頭直是夢流年屈指只堪驚一盃  
相屬公應悉冷煖難移故舊情

國佐侍郎併示佳篇謹復次韻

漂流歲晚憐羈跡慷慨平時仰令名問俗卜鄰依里社登  
瀛得友自都城諫書昔覩言常用偉論今傳衆尚驚未足  
朝眠何所事良辰詩酒最關情

見德升國佐酬贈歎愛不已用復次韻

常伯二卿俱擅美憲臺諫省各知名英詞宜和南熏曲雅  
意難追北斗城元禮風聲誰得御孟公姓字坐皆驚聯肩



接袂予何幸一笑從容每盡情

東城梅花示哲上人

一枝冷落為誰開欲遣寒香入酒杯  
鐵石心腸猶解賦芝蘭風味合相陪  
臘前頗訝踈踈見春盡何妨得得來  
十里東城不嫌遠待看山月照徘徊

題子正觀察溪風亭二首

巧據東西面勢雄茲亭壯觀一園中  
淙淙鳴甃過流水拂拂虛簷來遠風  
好解塵纓濯清泚聊披醉衽望穹窿  
冷然便欲乘風去汗漫相期孰與同  
溪上微波起縠紋涼颼不斷快餘醺  
飄飄弄袖疑輕舉馥馥吹花得細聞  
但羨園林今地主焉知公劍舊將軍  
功名興盡從吾好白首安閑少似君

德升尚書賦溪風亭二首以題為韻顧風字某已先

作別賦溪字一首

泉通暗甃瀉清溪倒影風亭翼瓦齊  
借問披襟聆漱玉何如擲甲聽征鞞  
相過底厭時揮塵獨坐應須日杖藜  
信美那知非我里倚欄歸路已都迷

題天台山石橋庵院

林麓陰森徑屈盤漸驚危步入重巒  
地分寶剎臨空翠天設飛梁跨激湍  
霧暗雲蒸山氣肅雪翻雷輓水聲寒  
我來不作多求想試出神光變現看  
按天台勝經載此詩作題石梁瀑布徑屈盤

霧暗作霜暗變現作徧現俱誤

宿獨覺院

早發招提宿雨晴征山猶帶夜香清  
山藏鳥道疑無路石



觸溪流自有聲適足此時逃世網收身何日濯塵纓迂踈愧之論思效尚得君王記姓名

故福國夫人挽歌詞二首席益

從夫禮法舊推稱訓子詩書亦蚤成烏府盡言知內助鳳

池得位見親榮今西廳參政本中書侍郎隙駒不究期願壽風木長悲

欲養情厚福尚餘湯沐地并歸賢詞作功名

蜀都旌節繼輝光象服重來意獨傷許國毋辭驅遠馭懷

人忍復舍中堂先太師嘗治成都及參政再領蜀新阡豈

料今同穴異縣端如在故鄉錯顧飛雲何處是西山松檟

已成行

奉和德升尚書探梅之什仍用元韻

題詩曾動何郎興寄遠猶傳陸凱名渴見寒英娛北客共

尋春信向東城蜂粘晴蕊應先破雀啣芳心已盡驚便擬

催開爭賦詠臘中獨使擅幽情

七月乙丑作記夢詩初不敢示人而私有傳去者德

升尚書邊先枉和索元篇

清夢分明到玉堂紫衣催引對龍章裁詔似令裁招移時罷尚

可揮毫半夜忙千里力疲心已悉十年境熟念難忘此生

未有酬恩日坐撫衰髯祇自傷

再用韻奉謝德升尚書見和且以解嘲

西風醒夢入秋堂夢境還空寄短章喜忘見徒嗟妨睡美閑

心久謝起朝忙流年倏忽身今老榮路斯須味已忘慚愧

君詩真戲謔邯鄲自警亦何傷

德升尚書併示新詩愈富而愈工不勝歎服顧見戲



之語不置而自處太謙謹和答以重致解嘲之意  
慶弔從來不下堂謾勞善頌費雕章自嗤夢已空花散更  
看詩為寐語忙論每闊踈時所棄才稱美秀上難忘我症  
屏跡君當起出處相違恐兩傷

重擬自賦一首呈德升尚書

旋葺幽居卜築堂歸棲不負乞閑章飲遭田父那辭醉雨  
覓漁師未覺忙汲汲功名徒競逐悠悠身世已兼忘此心  
真可安江海免使莊生笑重傷

蒙示敘舊之作情眷甚厚不可虛辱輒次元韻愧非  
所以為報也

八座方登政事堂一麾却佩郡侯章求閑宛轉常虞謗治  
劇從容豈厭忙老去昔遊君尚記夢回陳迹我俱忘相從

且共銜杯樂世路爭名巧中傷

奉酬已懋尚書用韻二首

紛紛胡騎來無定整整王師動有名已報妖氛掃秦甸還  
聞聘使龍城灼知天意民皆悅怯聽風聲寇自驚就養東  
朝歸駕近和戎深見聖人情

鄉邦甲第常牽興玉几金甌久記名會秉樞機還魏闕且

栽桃李滿春城郊原氣煖花將發閭里聲和犬不驚書昨日出

城所見勝日假時聊共樂未應歸隱狗高情

和郭傳師歲晚書事

塵掩龍韜玩具文雨昏金甲岸綸中橫行漸復思清海高  
卧端來傲翠筠推轂塞垣終用舊調絲洞戶且酬春不辭  
勝日來追賞却恐功名要及辰



漫成

生平雅志在林溪故里塵昏未定棲晚向瓊臺諧問舍喜  
當淮塞罷鳴鞞出郊賸喜園亭勝策杖應須酒榼携隨意  
一觴兼一詠醉言無次亦無題  
書迷今古懶不讀樽列聖賢時一中顧我本无當世志愛  
君真有古人風賜環忽恐歸期促放盞常嗟樂事空山鹿  
野麋便茂草鳳凰絡合止梧桐

佚老堂為丞相文安公作

社稷功名不自賢小園卜築賞閑年脫遺富貴還身外收  
拾芳菲寓目前未息烟塵勞屬望莫孤風月且留連一時  
賦詠多竒作江漢崧高好共編  
帝眷民瞻豈暫忘江山信美可終藏元勳合冠凌烟閣雅

興聊同綠野堂已作時霖却龍卧行看天討待鷹揚囑公  
未用安高退准擬功成老故鄉

寄青田縣令楊仲固

九載分違幾日同銅章又過淞江東芝田吏隱常看鶴山  
邑官閑早夢熊囹圄屢空知訟簡困倉相繼喜年豐傳聞  
江上風塵息相國寧忘幕府功

酬李元叔察院見寄

書到山中手自披炎涼不改似君稀術窮五技緣何事巢  
穩一枝聊可依掃跡經須休去好冥心深覺向來非緩廢  
清唱絨題罷却對松牕靜掩扉

重九日宴臨漳亭

九日追歡異昔年強隨時節到層巔俯觀殊俗身如客平



一鈔本  
瞰丹霄勢欲仙故國傷心滄海外行朝傾首碧雲邊興闌  
酒罷催歸馭四面嵐光合暮烟

雪晴

冰箸垂簷滴漸多銀花眩目氣初和功成尺瑞追前賦喜  
兆千箱可預歌坐看嫩黃滋柳色遙知新綠漲湖波閉門  
積玉渾消盡却有兒童整雀羅

喜雪呈已懋使君兼簡德升尚書國佐侍郎

憂民太守致精祈愛物天公意不違要及歲元彰瑞應故  
先春至作花飛梅藏疎葉餘芬馥山壓羣峰失翠微疫癘已  
消薶麥潤更隨晴色探芳菲

陪觀使太尉燕集長句兼簡座中諸公

遶過江山四望中一時共寓接羣公戚藩位列三司貴帥

闔班分二府崇華省名卿踵持橐

德升國佐皆任春官

廉車宿將久

藜弓追遊亦自鑿坡客顛顛今先鶴髮翁人事等閑欣戚  
異賓筵聊喜笑言同更須結伴春遊去已過催花幾信風

對客隱几詩

世路機兼穿人情楮與矛客能知許事兀兀一時休  
邊書猶插羽世用在持矛空言客何務問事其少休

晚晴讀書

成功收拾芥舊讀餘斷編時恩賢聖對久要故依然  
妄憂有妙理細與麪與論相携醉鄉去醒見月當門

山寺寓居

塵埃暗宮錦耒耜安田廬陳力知不能不肯獨何歟  
宣室思前席承明虛直廬不肯入州府分其終隱歟



東齋夜坐

當官肯虞謗遇事羞模稜  
閒來愛清夜默坐對青燈  
一時盛意氣四海竦風稜  
我懷非此念兀坐對青燈

藏海居士集

五言古詩

宋

吳可撰

題馬上元所藏趙墨隱畫淵明四詩

我不識趙子見此便得之  
談笑出丘壑粲然備四時  
似聞月旦許氣壓淵明詩  
馬卿宰白下慣作煙雲嬉  
歸來九衢塵舊好不少移  
慙懃著懷袖亦足慰夢思  
我本家北阜一官老京師  
頗懷月下松披圖覓幽姿  
正恐林間鶴怨我歸無期  
那知此心在衡宇終棲遲  
誰憐阿堵中幾有一斛泥  
願分溪上山供我笏挂頤  
吳秀才出示孫尚書詩求鄙作  
嘗知自許區區此  
往時家分寧風俗喜追隨  
挽留杯酒間往往醉如泥  
此年舍臨汝閉關無相知  
牢落三週星淹泊一水湄  
人事



即漸熟鄰曲不復疑聞有長者客清談頗忘疲宗盟晚  
相遇佳比野鶴姿過我忽長鳴傾倒胃中竒借問所從  
來半世游京師羣賢共文字聲明冠當時自得固有餘  
足能攀桂枝上以榮北堂下以光哀遲故山未暇往舊  
游不足思墻東或可隱便擬營茆茨竒懷傲南牕幽花  
擷東籬是亦差可落去此將何為恨未識胥鄧論交尚  
差池不妨氣類求相與慰飢渴同姓紛在眼邈然棄如  
遺此道已澆薄君乃敦篤之何當美盛德老矣徒嗟咨  
黃嬾厄兵火荒唐廢文辭毛子素偃蹇豈復能發揮誰  
為國士重自有尚書詩

題質龜軒

清江料事錯來作剗腸翁不知幾許靈墮此朽骨中時  
出縱橫文隨意侮兒童誰識軒中人本自無吉凶平生  
不驚俗要與衆客同人言可為鑒試卜來年豐

巖齋

誰知望雲眼犯此沒馬塵故山招不歸定為猿鶴嗔煌  
煌帝王州喜有東山人頻來雲霧齋閱公碧璘均要償  
風月債痛吟巖壑春賢我萬卷歲膏馥餘八珍空腸借  
一飽已覺笑語新肯學解頤公鑿壁惱四隣大勝不求  
直樂我平生真

筠寮

解衣一寮上物色太倉東栢禪費酬對松官縛爵祿此  
君真有道虚心自嵩谷每以閱世人得之定超俗夜夜  
幽露寒驚我庭下綠獨出萬物表清蟾映踈玉嘉此煙



霧姿本無霜雪辱朔風舞郊野秀氣壓羣木舊根走苔  
徑新梢出雲屋要令千畝廣會待春雨足

贈連楚狂

誰有畫魚癖詩社尋楚狂真成戲新荷徑欲穿垂楊餘  
生墮轍中恍然得濠梁寓興亦差樂江湖庶相忘

舟中即事

四顧彭蠡湖獨知廬阜尊疊障遮圍繞拱立猶見孫扶  
節望瀑布玉虹走祇園回步尋虛亭餘流漱瑤琨三峽  
誇幽險下有萬雷喧龍淵神物家孰敢窺清潭歸來有  
餘思妙音傳夢魂易州大孤傍山川出籠樊生平數佳  
士歡然笑語溫殊鄉愛遠客一見如弟昆直有卜鄰意  
便擬營柴門惜別屢往還遺酒盈瓶盆回首幽居雲忽  
作聚墨昏岡巒互起伏時為煙霧吞遙知急雨來坐看  
風水奔浮家苦漂泊且繫古柳根晚來喜新霽遙琴淡  
餘痕岸花自斌媚始怪秋色繁近沙羣鷺驚迥如積雪  
翻林間問茆屋欲與漁父言想像翠靄中疑有桃花源  
津子請息肩買醉上材我亦睡篷底輾轉吟東屯痛彼  
日月遠念此骨月存誰能致薪粢庶幾寒暄避秦豈本  
志多病不復論

送李四清

連侯愛畫魚李侯愛畫山詩情動幽懷摹寫不少閒騷  
雅移丹青妙寄雲水間翻然欲登涉試尋芷與蘭我不  
一音解早年使挂冠養拙顏簷下任真亦足歡敵騎踐  
江浙少長奔荆蠻却行虎狼區益知行路難亂來戰未



息老去食轉艱前年治南畝頗喜人牛安力耕日以廣  
心事日以寬行當遂野性策杖尋江干雲深幾苑屋柳  
映一柴關扁舟鳴撥刺危亭秀孱顏安得兩玉人隣曲  
相追攀真賞會心處應當謝毫端長我洗兵馬隨意羅  
杯盤伯雅要傾作莫厭數往還願如三徑松餘生同歲  
寒

送王觀

文正活國手頗恨見不及宦遊識其孫想像高冠岌豈  
但為交承自是賢友執尤思談性命微到鬼神泣吾曹  
飲滄海百川羨一吸失却大官味卷舌舐泥汁因依既  
云久臨別百憂集去去好護持雨荷終不濕

避地桂楊山門招友人晚飲

荒城住行李故人亦淹留稍遷墟丘間愛此石泉幽長  
夏晴復雨風氣如清秋開樽茅茨下馬能消百憂客懷  
滯荆楚念之成白頭今宵理歸夢一棹隨風流

過許醉吟痛飲月下戲書

塵埃沒我馬掉鞅吟公詩詩中有江山不覺在京師下  
馬自叩門來尋元紫芝欲掃名利心笑挹丘壑姿東簷  
坐無羶壯風吹酒卮蟹螯互勸酬墜車兩不辭聽公擊  
節吟悲壯亦自奇看公醉山倒了不遣客歸客歸意亦  
好月色到處隨詩成月下寫淡墨任傾歌平生不知韵  
興來聊續之詞達語更正識者未必嗤

探梅

探春逼殘歲幽香度寒原欲看枝橫水會待月掛村誰



憐槁木中妙有春風根孤芳自一丘不受煙霧昏飽霜  
分踈瘦下笑浪蕊繁喜無蜂蝶知那與桃李言要當碧  
雲暮殷勤賦離魂

秦定齋詩

寂然數椽下獨耀一宇內脫落山水因妙出仁智外君  
看鑑中事作止本無礙年來識坐忘唯餘照心在

安靜齋詩

歸來便閒適松檜自儔侶扶踈媚虛堂初無一禽語長  
哦柴桑詩妙香吐雲縷平生壑源好蓮甌發新乳痛洗  
朝來忙得意乃如許輪蹄不到門幽壁掛犀塵笑拂維  
摩床西窓睡秋雨

失題

熟官惱狂士米山倚嚴冬此計定不長會作湏臾空先  
生踏金門大節孝與忠能事不掛口處之如無功高隱  
百僚上妙有淵明風東垣着巖岫南榮著檜松踈窓澹  
山影雲霧穿玲瓏澄流粲錦石一練搖青紅笑携玉色  
醪酌彼千石鍾良時飲文字此興誰與同為君指佳處  
不落捷徑中從來論丘壑風味過庾公

七言古詩

秘古堂詩

羣兒只解秘金玉百歲作癡空潤屋君家勝味渠不知  
掉頭歸來北窓讀挿架整整三萬千誰何有書真不然  
是中文字到蚪蚪補亡應得由庾篇異錦千囊更妙好  
中有玉奩藏小草不煩脫帽若揮毫漫說驚蛇雜風鳥



摩挲鼎彝自笑語碧暈堆花久瘞土懸知百好墮兒戲  
此物一出吞萬古客來錯惡初不解把玩慙懃定為怪  
我知此老極不淺規模正欲超三代

題翹翠軒詩

老木拔雲蒼翠起新篁挾雨枝葉美下有數峯益苔寒  
先生俯仰一笑喜乘興把書坐秋風超然吐論飛長虹  
客星忽去壁月上陶陶醉卧玻璃中

李氏誤書齋

李侯平生無他好眼中黃卷常自娛明窓危坐對賢聖  
鼓吹不可一日無欣然會意便忘食心醉何止勤三餘  
幾年携家避盜寇尚得戲綵乘潘輿攝官江水有何好  
濶步日邊真良圖試求假直亦不惡他年不減行秘書

故人來自春陵出示初寮翰墨感時懷舊輒為長

句

先生視草白玉堂文章一出自名世分光蓮獨真為榮  
拭吐龍中何足擬良岑夜台趨神霄憐我婆娑百僚底  
紫禁歡傳拜左轄漫刺走賀城南第羸僮瘦馬堂階下  
歎我麓官殊少味驚聞一麾出燕山旆旌遽下雲漢間  
睿思官曹方顧寵笑我翻然歸挂冠金兵南來郡國破  
二聖北狩天步艱黎元鼎沸死鄉士士夫雲擾奔荆蠻  
一人嘗膽固不易諸將東冒今何難朝來喜見春陵客  
問訊先生多翰墨懷古傷時初不忘回首長安淚橫臆  
君不見虎踞龍盤氣象雄王者都此成大功遙知廟堂  
有高論似聞天蹕移江東幾年中興要賢俊頗懷仲父



安東晉

醉鄉詩

飲中境界妙四海楚屈未知風俗淳陶然席地已忘載  
夜縛甕下初不嗔逃禪罵坐本真率時一中之眇萬物  
縱兵端欲捲愁城樂賢未始忘歡伯佳處風光殊可人  
好德懸知必有鄰黃花解勸張季鷹俗婦那識劉伯倫  
世間萬物敗人意不如常作箇中計

山居見梅

孤吟梅花望神京澆愁恨無雙玉併上林頽影一坐傾  
高樓忍作昭華聲避兵南州老雲壑風味依然殊不惡  
歲暮渾無驛使來一笑天涯共流落行尋嶺頭路幾許  
欲買幽園歎貧窶清客那知日邊事獨坐茅茨對煙雨

夜聞警

幾年官軍破郡邑遠客孤村誰脫急卧聽鄰鷄三鼓鳴  
流言敵騎一宵及抱衾幼強強趨走復嶺重山且深入  
為聞北人畏和暖安得如今便驚蟄長秋南奔苦嵐瘴  
翠華連幸犯卑濕顧我飄零豈足念注目寒江忘久立

五言律詩

即事

勁敵謀應大春來勢轉雄烽煙驚北闕鼙鼓戰東風雪  
舞愁雲外花飛淚眼中翠華行樂處曳甲照寒空

寄李道夫

亂後時通問飄流尚此身干戈傷白髮桃李自青春故  
國田疇遠殊方盜賊頻知君懷老伴詩酒慰情親



遊清涼寺

延步石城塢迢迢去興長野田耕晚雪寒樹倚斜陽載  
酒追狂客論才得漫郎無因遂高蹈時復借山房

養竹

渭川分一種親植隱嵩東有寔終來鳳無心自化龍疎  
陰留夜月清韻起秋風待養鼃竿就滄溟作釣翁

登臨川城

時危傷去國歲晚強登城過鴈書難問窮途淚欲傾江  
湖歸客夢梅柳故園情倚杖空凝竚行藏竟不成

懷歸

久客江湖遠頻年道路難干戈侵海內猿鶴老山間地  
僻林泉古雲深日月間餘生猶轉徙清夢遶柴閨

五言排律

次韻曾中父登臨川郡樓書事

戈甲何為盛田園已就荒僅能移北阜未暇隱東墻寂  
寞交親遠漂零道路長歸心隨斷鴈離思感垂陽避寇  
湘江水依劉汝水傍閭閻嗟逼仄登眺喜寬涼遠岫誰  
能履寒溪竟欲航冰盤悲玉井風簟愛筠林地盡妖氛  
氣春餘草木光寶薰煙霧細仙茗笑談香接武青雲路  
論文綠野堂虎皮空自悅猿臂定誰攘取友真多益求  
田苦未藏撐腸披錦繡漱石飽膏肓隱逸追元亮風騷  
近子昂栖鷗啼古堞幽檻倚斜陽離亂知誰健行藏只  
自腸舊巢看燕今雨任浪浪道勝依鷺子才高歎夜郎  
五峯興不淺星漢擬文章



七言律詩

友人惠笋鼓

野稅那知笋鼓香伊蒲淡泊喜初嘗自憐老去能忘肉

謂肉誰謂朝來已徹薑謂豆膾玉有名汗淨供尊絲無

味誑枯腸此君苗裔風流在三韭何須學庾郎

謝友人約居橫林

遠煩招隱費長吟緩急方知故舊心懷土若為家直瀆

避喧真欲客橫林人材何敢追連璧氣類聊能擬斷金

卜築要須孤絕處落花流水恐相尋

春雪後寄范長民

回首長安淚滿衣東風如舊鬢成絲扶持衰病元無術

感嘆飄零漫有詩那信夢魂隨北鴈忍看霜雪滿南枝

幽居只合從公等自笑年來見事遲

呈秦楚材

倒指煙塵歲月深引杯看劍漫悲吟平生自嘆雕蟲手

末路空慙紙擯心賸喜星郎上雲漢苦憐鶴髮避山林

君家伯仲真廊廟痛為中興惜寸陰

和人聞笛

鄰笛聲哀不自安轉移宮調幾多般夢回飛蝶三千里

月照高樓十二欄別鶴唳長秋露重老龍吟苦夜潭寒

清愁一晌知何限待啟菱花向曉看

簇翠亭

此老作亭蒼翠間定知胷次有東山朝陽破霧烘林影

醉袖扶花繞髻鬟露警丹哥傳妙響雪眠碧友自清閒



欲專一壑從來事回首塵埃亦厚顏

廬山香林訪趙德麟

艤舟星渚得幽尋問訊先生隱翠岑  
欲禮光明依淨社便隨氣類老香林  
貂金且換陶潛醉囊錦聊追白傅吟  
坡客飄零有公在與誰揮淚說知音

探梅

柳未搖金草未芽尋幽逸興屬詩家  
不辭山下五六里為愛枝頭三四花  
噴月清香猶吝惜印溪疎影恣橫斜  
固應羞澁怯寒峭結子成陰已有涯

送李秀才為道士

聖澤朝來淨世緣不教千骨墮儒門  
金龜換酒當年客白鹿昇天後世孫  
泉石招君友猿鶴利名憐我醉朝昏  
麻衣笑着掉頭去何處抱琴追綺園

豫章道中

僕已疲勞馬已頽忍能日日犯風埃  
前山斷處後山出舊雨晴時新雨來  
梅子有情沿路熟麥花無數及時開  
一春客裏消磨盡舉眼豫章安在哉

九日

佳節初回苦未涼疎林高下半青黃  
佩茱頗喜人猶健採菊還憐蝶尚狂  
不惜登山聊舉句欲因戲馬漫擊蒼  
笑歌醉帽歸來晚稍覺幽庭月似霜

次韻黃簿九日

客裏登高意若何笑扶藜杖興還多  
葉金委地誰能布山劍橫天不受磨  
隨遇可無揮翰手感時空有斷腸歌



尚憐把菊煙塵外自鏡哀客半欲酡

寄米元暉

田廬寂寂近塘坳仕路紛紛久絕交多病未能從五柳  
避喧端欲老三茆白雲那思間歸岫紫燕空慙漫累巢  
聞再落聞道金壇有仙隱夢回清月墮林稍

五言絕句

野步

密竹藏啼鳥荒村起白煙人行秋色裏家在夕陽邊

夜坐

索索風搖幕亭亭月過墻晴雷推粉磨夜雨壓糟床

七言絕句

春霽

南國春光一半歸杏花零落雨霏微新晴院宇寒猶在  
曉絮欺風不肯飛

春晚

門外綠楊啼乳鴉弄黃梅子壓枝斜殘書讀罷無功課  
遶徑來尋未落花

蜂兒擷蕊趁花心燕子啣泥掠柳陰處處浸秧黃乍吐  
護田肥水半篙深

踏青

幽居懶慢養餘生強為春風處處行藉草弄花終少味  
尋山愛竹尚多情

過巢邑

竹杖芒鞋蹋短蓬沒篙春水飽帆風兩閑山寺山無數



盡在濛濛煙雨中

村居

鑿井耕田僅萬家農夫農婦畢絲麻夜來得雨陂塘足  
村北村南罷踏車

荒陂

荒陂終日水車鳴村北村南共一聲掠面春風吹小雨  
鄙夫時向此時成

松

秋色何妨陪露菊歲寒真欲友霜筠只應澗底桃花笑  
苦愛微官不避秦

晚步

野樹踈踈透夕陽歸鴉零亂不成行春風可是間來往

時送江梅一陣香

書却暑圖後

冰柱雪車誰復作礮頭凌面未能摹北窓揮汗渾無奈  
漫借君家却暑圖

偶贈陳居士

楚酒困人三日醉園花着雨百般紅  
憑誰畫出陳居士  
亭角尋詩袖滿風

村巷詩

村巷深深桑柘烟園林寂靜落花天紫門有客忙相揖  
揺手低聲蠶大眠

田家女

兩兩垂髻窈窕娘含羞無語蒔青秧  
翻思貴室千金女



笑倚紅樓抹曉粧

初涼

初涼宜夜透衣羅時見流星度絳河漸覺露溥金掌重  
梧桐影外月明多

小醉

小醉初醒過竹村數家殘雪擁籬根風前有恨梅千點  
溪上無人月一痕

豫章文集

觀書有感

靜處觀心塵不染閑中稽古意尤深周誠程敬應粗會奧  
理休從此外生尋

自警

性地栽培恐易蕪是非理欲謹於初孔顏樂地非難造好  
讀誠明靜定書

示書生

知行蹊徑固非難每在操存養性間此道悟來隨寓見一  
毫物慾敢相關

顏樂齋

宋 羅從彥





山染嵐光帶日黃  
瀟然茅屋枕池塘  
自知寡與真堪笑  
賴有顏瓢一味長

邀月臺

矮作垣墻小作臺  
時邀明月寫襟懷  
夜深獨有長庚伴  
不許庸人取次來  
後改云也知鄰闔非吾事且把行藏付酒杯  
延平羅生云羅先生山居詩侗記不全今只據追思  
得者錄去邀月臺詩云侗見先生出此詩後兩白不  
愜人意嘗妄意云先生可改下兩句不甚渾然先生  
剖云也知鄰闔非吾事且把行藏付酒杯蓋作此數  
絕時正靖康間也

送南劍王守歸

三年政化被生民  
甘雨祥風溢劍津  
解組幡然賦歸去  
攀

轅無計可留恂

未把陽關三疊吟  
且將謬句寫離心  
千尋浩浩罈溪水  
別恨不知誰淺深

勉李愿中五首

愿中以家書甚力作詩五首以勉其意然借視黎於聲盲未知是否

聖道由來自坦夷  
休迷佛惑他岐死  
灰槁木渾無用  
緣置心官不肯思  
學道以思為上孟子曰心之官則思書曰思日察察作聖惟狂克念作聖佛法一切反是  
不聞鷄犬鬧桑麻  
仁宅安居是我家  
耕種情田勤禮義  
眼前風物任繁華

今古乾坤共此身  
安身須是且安民  
臨深履綠何事祇恐

操心近天人

此吾聖人之學申韓佛老皆有書在決擇也

彩筆畫空空不染利  
刀割水水無痕人心  
但得如空水與物  
自然無怨恩  
吾道當無疑於物



權門來往絕行踪一片閑雲過九峯不似在家貧亦好水  
邊林下養疎庸

自述

松菊相親莫懣頻紛紛人世只紅塵自憐寡與真堪笑賴  
有清風是故人

題一鉢菴

可憐萱草信無憂誰謂幽蘭解結愁欲得寸田斷荆棘只

消一作祇應長伴赤松游

挽吉溪吳助教首二

室富真儒業門多長者車明經方教子得第已榮家性守  
仍知分天然不愛奢百年成古昔行路亦咨嗟

新生誇躡躅舊德嘆凋零冷帶商岩月光凌處士星布衣

難祿白首易窮經追想今何在溪流對洞庭

顏樂亭用陳默堂韻

平時仰止在高山要以亭名樂內顏顛倒一生渾是夢尋  
思百計不如閑心齋肯與塵汙染陋巷寧容俗往還堅守  
簞瓢心不改恐流乞祭向墻間

寄傲軒用陳默堂韻

自嗟踽踽復涼涼糊口安能仰四方目送歸鴻心自遠門  
堪羅雀日偏長家徒四壁樽仍綠侯戶千頭橘又黃我醉  
欲眠卿且去陪俗客語羲皇

濯纓亭用陳默堂韻

十載猶縉京洛歲歸歟那復廁朝紳君今談笑青油幕我  
但魏我烏角巾江漢更從尼父濯衣冠寧羨屈原新欲賡



孺子滄浪吟會意須還舍瑟人

題靜亭

鼎創新亭靜更幽四時景象鎮長流端如和氣裏談恍若  
春風中泳游排闥山供藍色重憑欄水擁壁光浮我來登  
賞無窮趣好把篇詩與唱酬

送延年行

延年弟子也不知何姓以詩  
辭歸先生因用韻而餞其行

聖言天遠海潭潭獨在潛心久泳涵猥念百家心已好安  
將一貫與君談賢如賜也才知二學若陳只元得三此道悞  
未因自足却隨鴝話圖南

再用韻送延年

心源寂靜映寒潭每欲操行更養涵顧我日思攀劇論荷  
君時遇得高談眼前舊識知多少物外深交沒二三幸久

相親頻握手遽我分別又東南

和延年岩桂

幾樹芬芬檀與沉枝枝若占却家林風搖已認飄殘菊日  
照渾疑綴散金山窟移來成美景東堂分去結清陰我今  
不願蟾宮折待到蟾宮向上吟

題德士退菴

牛頭山頂鏢煙霞簷月松風即我家筏渡有情新活計袋  
空無物舊生涯已將黃葉分隻手却攜白茅占一窠會得  
懶慵歸去路索然忘鳥更忘花

賀田溪張公遷居

華構經營占地靈濃嵐環合數峯青苟完公子方成室趨  
訓兒孫已過庭豈止一時誇壯麗定知百世享安寧顧惟



善頌非張老祇貢湯盤往日銘

和張公叙別古風

良工創新第瀟洒侔洞房經營未畢工四方方興堵蛟龍  
忽夜徙空中震雷雨親舊賀于門主人迎孔戶連喚鳳兒  
來藏書幾多部為我張廣筵酌賓酌以旅人謂主公賢敦  
朴嗤峻宇規模出心匠務卑由乃祖欲畜久安逸勿舜暫  
勞苦忠孝闡家門詩禮光族緒居室云苟完謙冲彌自處  
玉石不分別鶴鷄謾為侶顧予局促輩鄉評少推許嘗遊  
莊嶽間喜作齊人語何幸天相之惓然交鄰魯早年欽大  
名馳書聊以序比來揖清風談笑揮玉塵見之名利盡久  
侍豈無補素志以深酌青眼猶相與默念湯盤頌未為傾  
肺腑何當惠古風錦綉施牋緒妙曲誠寡和取則憑柯斧

先生曰白寐龕寄傲軒皆有詩及銘記數篇以紙蠹朽  
錄不能全俟後搜尋真本當得其錄皆嘉定己卯中春  
屏山羅棠君美敬書



柳江百咏序

柳古桂陽郡陳迹故事盡載圖史亦間見於名人才士歌咏如杜子美寄聶令入柳州韓退之柳江柳子厚登北樓沈佺期望仙山戴叔倫過柳州之類是也山川寺觀之勝城郭臺榭之壯未經品題者尚多亦可惜爾余官於柳三年常欲補其闕愧無大筆雅思可為然因暇日時作一二小詩遂積至於百篇雖不敢比迹前輩使未嘗到湖湘者觀之亦可知柳在荆楚自是一佳郡也宣和甲辰二月中和日舒城阮閱序



柳江百咏

三山東樓

危城雉堞對東山  
誰叙高樓十二欄  
獨寫不來松已老  
春風動處日三竿

宋 阮 閱



上仙閣

曲檻危梯紫翠中  
蘇仙宅畔古城東  
不須更著登山屐  
萬岫千峰一日窮

俯春亭

城上危亭可摘雲  
四邊山色翠為隣  
下窺城郭無餘蘊  
草色花光盡是春

山陰堂



修竹蒼蒼似剡川浮觴可繼永和年不知誰有羲之筆欲  
寫蘭亭第二篇

藏春亭

百紫千紅一逕深  
胭脂為地粉為林  
有人來問春何在  
向道花間無處尋

靈壽庵

結茅編竹對高叢  
不種脩篁不植松  
但得數枝花似雪  
何須裁截伴枯筇

清淑堂

三仙一相有遺風  
清淑誰言到此窮  
寄與郴陽忠信士  
得名端合謝韓公

篔簹亭

娟娟細細兩三叢  
却厭桃花相近紅  
已有數枝湘浦月  
消千畝渭川風

三懷堂

東京吏治孰稱循  
范曄繞書十二人  
前日桂陽三太守  
許誰來此繼芳塵

射圃亭

不似投壺漫雅歌  
縱賢無奈罰觥何  
若知蓬矢桑弧意  
不用穿楊中鵠多

紫芝亭

和氣薰蒸庶草靈  
昔年聞有紫芝生  
史官不絕書祥瑞  
幾欲圖形獻此名

擷芳園



萬萼千枝二月春只愁風雨便成塵不知誰擷香英去自有尋芳拾翠人

砌臺

翠珉斜倚若危梯上出高城下枕池不但綺羅為戲事又將臺使補盧兜

西樓

危樓百尺隈東山簾幙秋風捲暮寒試向殘陽新月看幾人曾此凭闌干

真仙亭

雕甍畫棟對群山遠目增明盡日看無奈人心多險偽須求拳石作峰巒

碧虛亭

筇竹枝彎屐齒搖登臨身覺在烟霄千峰險似三川峽一水深如八月潮

北湖亭

簷楹山影水光中攜酒時來伴釣翁四岸烟雲芳草綠一欄風雨落花紅

綠淨堂

綠如青草淨如淵遠近山光上下天有客凭欄若相問為言此處似蒸川

湖亭

城外高堂俯碧灣山如螺黛水如環有時鼓棹來尋勝直到斜陽未欲還

北園



一塢春風北苑芽滿川流水武陵花溪東舊觀仙人宅城  
內高樓刺史家

輝松臺

靈壽峰前路有苔松門依舊對山開幽人野叟尋僧至時  
有輝輝大旆來

燕臺堂

山有香爐水有瓶齋無塵榻閣無鈴胡床塵拂枯藜杖門  
對江山日夜扃

竹軒

軒戶蕭條對北垣誰來此地種檀欒無人會得青青意雨  
洗風吹葉葉寒

白蓮亭

石甃方池種白蓮庵僧欲紹遠公禪文皮塵尾來遊處誰  
似廬山十八賢

南樓

雉堞譙樓紫翠環紅塵擾擾白雲閑蠻烟瘴雨千峰外邑  
屋人家十里間

東園

芳春閣外茂林中池上新橋綠逕通誰種松篁藏古意我  
栽桃李引春風

蘇仙觀

寂寂新壇長綠苔井邊橘老又重栽城頭依舊東樓在未  
見當時鶴再來

成仙觀



仙去寥寥幾百春  
隱居依舊在湖瀕  
枝頭禽語人難會  
石上螺踪事已陳

露仙觀

寂寞荒壇枕水邊  
長沙施藥已千年  
松間風露如前日  
何事無人更得仙

騾穴觀

朝辭湘楚暮山東  
今在蓬萊第幾峯  
可笑時人空擾擾  
武昌山下問騾蹤

景星觀

聖世休祥見景星  
曾聞瑞日慶雲生  
羽人中夜來朝斗  
透過松梢一點明

東山

藜杖芒屨過水東  
紅裙寂寞酒樽空  
郡人見我應相笑  
不似山公與謝公

五蓋山

五峯如蓋色蒼蒼  
隔斷蠻陬與瘴鄉  
繞見山中冬有雪  
柳人預說歲豐穰

黃相山

東帶連山接五羊  
西分柳水下三湘  
路人到此休南去  
嶺外千峰盡瘴鄉

百丈山

縈迂鳥道少人通  
只有豺狼夜過踪  
自銜峻嶒踰百丈  
安知七十二高峰

孤山



瘴山蠻嶺鬪嵯峨高可躋登不可磨萬岫千岩皆鬪茸一  
峰孤秀不如多

雕玉山

崕崕崎嶇石面霄何曾溫潤似瓊瑤一堆頑碧柳江上縱  
有昆刀不可雕

枕柳山

休言鳥道與羊腸鳥道羊腸不可方却喜年年種麩麥山  
中不用有枕柳

馬嶺

牛山日日夕陽紅鹿洞年年草色濃更有當時馬行處柳  
人猶指舊驂蹤

話石

人世曉曉已不根更堪頑石又紛紛何如緘口藏長舌道  
路如今已厭聞

白鹿岩

風馭雲軒鶴羽輕野麋長此望霓旌當時岩下藏身處依  
舊春來草自生

坦山岩

空山夜雨鬼神愁恠石層崖虎豹憂鳥道不通車馬到只  
供衲子羽人遊

兜率岩

泉如鉛汞流丹竈石似珊瑚出海濤不會當時融結意區  
區雖巧亦何勞

王履岩



勾踐因何渡楚川  
蒼蒼雙石卧寒烟  
當時縱使為淫巧  
片石安能作履穿

柳江口

扁舟斗轉急如飛  
對此令人憶退之  
不但柳江有佳句  
又魚禱雨盡留詩

靈湫

老蛟力鬪死池中  
山下流泉暗谷通  
風雨年年常十五  
休將涓滴強邀功

中洲

捲地江流遶古城  
參天喬木一洲橫  
年年秋雨無情甚  
沙嘴纔高又壓平

崇德河

楚俗聲音誤最多  
近來方證桂門訛  
分明流向柳人道  
此水今明崇德河

怨溪

濺濺溪水石磷磷  
兩岸山花野草春  
流去前灘何處問  
不知當日怨何人

千秋水

不求至道不修真  
一穴涓涓豈有神  
王錫蘓耽已仙去  
未應昏是酌泉人

潮井

朔月盈虧已可疑  
隨泉上下更難知  
錢塘江在吳山外  
誰見來時與落時

石曼卿井

石曼卿井與世並  
愈愈愈愈愈愈愈  
愈愈愈愈愈愈愈  
愈愈愈愈愈愈愈



可畏人情與世途險如波浪起江湖豈知荆楚山川地坎  
水泓泉無處無

摘井

蘇仙舊隱已藤蘿摘井空來歲月多摘葉汲泉昏朽骨郡  
人猶說愈沉疴

愈泉

未載人間肘後書此名直恐是相誣古人詩病知多少試  
問從來療得無

圓泉

清冽淵淵一竇圓每來嘗為試茶煎又新水鑿全然誤第  
作人間十八泉

溫泉

誰將炎熱換清涼可使澄泓作沸揚從賜驪山妃子沐人  
間處處重溫湯

香泉

僧舍靈源靜不流只供齋鉢與茶甌直應老衲投薰陸石  
罇雲根久未收

醞醖泉

玉為麴藥石為壚萬榼千壺汲未枯山下家家有醇酒釀  
時皆用此泉無

蒙泉

流出山根無盡時潛深不似瀑泉飛此時非淨還非垢欲  
洗須知是鈍機

劔泉



太阿氣在斗牛邊報惠論讐世有仙黥賊東來搗敗鉄地  
靈安肯為生泉

貪泉

玉潔冰寒徹底清不因汲引有虧盈廉泉讓水貪無異空  
使時人惡此名

寒泉

春欲為霜夏欲冰一山寒氣逼人清應知炎冷難同處甘  
與湯泉各自生

柳江

不分涓滴溉田疇只有重灘碍巨舟險似瞿塘并賴水豈  
能如鑑瀉清流

靈壽木

聊依枯木伴寒藤曾為當年孔傅生寂寞空山窮谷裏如  
今文杏又爭名

茶山寺

莽草寒蘆事不經八峯深在亂雲層只因一句鸞湖識直  
至如今有此稱

會勝寺

靈壽山前古梵宮粥魚齋鼓白雲中衲僧若會蒙泉意竟  
與曹溪一逕通

香山寺

十里城南古道場一泓寒水翠微傍幽人衲子時來汲疑  
是山中草木香

崇毅寺



城外招提竹隱門更無一點利名塵蒲團紙帳松窓下却有安禪卷藏人

乾明寺

寺古僧殘丈室空我來試問老禪翁直松曲棘都休道庭下山茶為甚紅

開福寺

柳江東畔小禪林誰見當年地布金夜磬一敲僧定出水聲東去月西沉

開利寺

修篁喬木水西涯古屋頽垣達磨家持筴但聞僧乞供杜門不為客烹茶

東山寺

竹外長橋過水西林中鐘磬舊禪扉筇迎殘月僧包去帆背斜陽客艇歸

太平寺

石虎城西柳水邊支提突兀祖燈傳有人認得雙岩桂何必庭前栢子禪

南塔寺

江岸南峰對石城僧房高在亂雲層臺前天閣秋多月塔上風微夜有燈

妙勝寺

誰營僧舍近西城今與行人作短亭庭下秋風花簌簌門前春水竹青青

永慶寺



空庭生草路生苔寂寂荆扉小  
逕開有客試泉方到此須  
知不是為僧來

尊勝寺

老僧不復識叢林是說幽棲是息心  
可惜一溪東去水更無軒石稱登臨

白虎城

楚人未築上游城千古冤聲尚未平  
雉堞已經無白虎不知何用昔時名

石城

柳江淼淼接湘天層壁重崖北水邊  
數日東風春浪惡漁舟不是莫愁船

蘇仙祠

羽節雲旌事已空舊庵今在最高峰  
拂壇不見當時竹繫馬猶存舊日松

孝婦塚

國史班班有舊聞欲將重說與  
柳人教知蔡婦潛然意可比神仙  
漉酒中

久留岡

穎人間欲問柳人衛颯如何似  
寇恂只恐當時遮道者不應  
昏是惜留人

劉相國書堂

疎林翠竹水滄滄問是劉公舊  
隱堂但得青編有完傳故居  
寂寞亦何妨

宋樽



山中聞有酒官泉復有穴樽在水邊荆楚人皆喜群飲見時應有口流涎

迷橋

林花岸柳草芊芊山下長橋跨碧川往事茫茫無問處不知迷俗是迷仙

桂門關

惡名辨正可無疑已有金華學士題寄語往來荆廣客鬼門關在鬱林西

漏天

從古常聞有漏天此言恐是里人傳山深自合常多雨不是媧皇補未全

飛仙橋

櫃中飛出過遼天樓上歸來又幾年雲物已閑松已老芝田依舊在橋邊

棲鳳驛

鳳出明時欲覽輝棲桐食竹屢來儀空山窮谷無丹穴肯伴鷓鴣共一枝

龜峰鋪

山似龜形古戍西路人到此欲稽疑剗腸鑽灼猶難信頑石何緣解有知

蔡倫宅

竹簡韋編寫六經不知何用搗枯藤自從杵臼深藏後采楮春桑事已更

西湖



岸草江花對夕陽滿船新綠夜鳴柳秋清菡萏紅千柄風  
靜琉璃碧一方

附錄

宣風道上

馬蹄西去夕陽催濃淡寒山翠作堆北雁無情怕秋熱帶  
將寒信過江來

題春波亭

數葉荷衣一短蓑春波亭上倚斜暉無人會得詩中畫凭  
盡闌干又獨歸二詩見袁州府志

歐陽修撰集原序

予為兒時聞德明歐陽公日記數千言落筆便有可觀雖  
生客十輩隨事泛應捷若斧機意其胷奇氣逸必有異于  
人者比於其弟國平家得其遺文一編大抵咳唾揮斥之  
餘十百不存一二讀之飄然皆有不羣之思迹其盛氣憤  
蓄如萬鈞強弩引滿向敵雖未能保其必中勢必一發而  
後已稽諸前人抑太白之流乎白遇明皇妃子間逸氣少  
舒故得以文配杜而為一代詞人公遭靖康橫決之變忘  
身拯溺不暇規行改得以忠配陳而為中朝義士皆不世  
才也至所存緩急之殊宜所造淺深之異趣以此易彼後  
世必有能辨予姑取其文之近似而可喜得古律詩詞書  
語八十有七次而編之名曰飄集集觀者得此亦足想公為



人矣公諱澈派自廬陵郡世家崇仁西者死于京師時年三十一追贈朝奉郎祕閣脩撰事詳國史自公以忠言沒天下痛惜迨今不哀思其人犹及於甘棠况于其文於是環溪吳沆為之序盖紹興二十六年也

夫子有言人之生也直罔之生也幸而免又曰斯民也三代之所以直道而行也嗚呼人稟天地之靈則典生俱生者直而已矣反之而縮養之而無害浩然之氣無所往而不自得焉至其疾邪愆世殺身成仁謂非同歸一揆不可也世道有隆汙風俗有振靡惟天地之正氣未嘗不流通于人心於是可見天地之心矣崇觀政宣以來直氣衰絕馴至靖康而陳歐二君奮焉而興今觀其策所願行者皆天下之共欲也所願去者皆天下之惡也夫然後知真

氣之在天地間故未始衰且絕也其幸而祥風慶雲充塞宇宙其不幸而嚴霜凍雹摧拉草木抑亦偶其所逢而於元氣之初果何尤哉二君之生雖罹酷濫于誤國之奸臣二君之死旋被褒榮于悔過之聖主名節凜々又將與天地相為終始矣陳君言論風旨調攝當時傳于政府足以不朽歐陽君慷慨激烈孤謹豪邁而其遺文獨未概見余來佐郡實君之鄉得其靖康所上三書及詩文百餘首輯為一編釐為六卷列而布之俾與陳君並駕齊驅以不孤中興偕命之詔盖聞南都之禍陳君從容區處泰若平日人或以為二君優劣之辨嗟夫陳君處六館知朝廷之政詳故其言雖深切而皆中時務伏闕紛紜分死久矣歐陽君僻在江右起於疎賤不勝忠憤故其言尤峭直而容有



未審忽斧鉞不能歸葬尚忍以優劣議哉昔張許固守睢  
陽以蔽江淮厥功茂矣兩家子弟猶不相知由今觀之巡  
信忠矣遠將不得為忠臣乎論二君者蓋有質于斯時嘉  
定甲申歲重午日會稽胡衍序

歐陽脩撰集

宋 歐陽澈

飄然集上

醉中食鱸歌

君不見秋風未發鱸正肥張翰思歸心欲飛又不見田文  
有客歌彈鋏為歎無魚聲激烈水晶細鱸落金盤須信江  
南味中絕山谷曾名醒酒水一筋未嘗近俗客助盤橙橘  
薦甘酸入口瓊瑤碎牙頰扶起嵇康頽玉山滌破樂天醉  
吟醜烹龍庖鳳未云珍策勲終是愧霜鱗江湖散人具不  
淺為羨此品常垂綸有時舉竿獲錦鯉玉屑花中爛拚醉  
咲他大嚼市廛流浪說屠門能快意靈運池中蓄頗多揚  
鬚鼓鬣戲清波知我平生嗜此癖霜刀細縷紅玉槎典衣



沽酒試轟飲，頰紋入面春。風和男兒大，抵皆忼慨功名未。  
兀常蹉跎，醉來擊劍歌白雪。閑愁萬斛俱消磨，杯盃雖冷  
落風月，輸吟哦。逸氣射牛斗，無人識。太阿俗態翻雲，仍覆  
兩世情。炙手攫張羅，丈夫富貴當自致。恥傍權門，効女蘿。  
雄圖自許，羞俯仰。請看毫端食鱸歌。

七夕後一日寄陳巨濟

并引

去年七夕待試臨川，二三友泛遊于吳溪，閣江山氣  
象如在冰壺玉鑑中。汝川勝槩一目而盡，酒酣茶興  
視脫塵埃如棄敝屣，舒箋點翰，爭賦新詩，以摠逸氣。  
今年七夕，憂患沮喪，宵意約結，強追談笑，會諸友飲  
于遽軒，眼對景物，約畧昔時面懷舊事，愴然驚怛，黎  
明欲遣人問巨濟，動靜戲作古詩，以供捧腹。

高樓昨夜西風轉，耿耿銀河雲葉卷。擎空皎月弄婵娟，領  
畧溪山堪指點。秋光次第磨青銅，一味清涼敲庭院。遙知  
天外鵲橋成，織女牛郎會。佳燕凭高翻憶鳳，樓人慙慙乞  
巧。陳芳真可堪，目斷心旌搖。砌成幽恨無人展，但樽飲得  
莫逆交脉。閑愁憑理遣，清狂舉白話。平生午夜香燃殘，  
寶篆淒涼此際憶。年時爛漫瓊樓，只不淺。

重遊寥陽洞有感

尋真曾到寥陽殿，小立廊腰花影轉。飛瓊仙子下瑤臺，綽  
約雲鬟眼波剪。水沉烟斷一簾秋，醉睡海棠紅玉軟。武陵  
歸去探年華，楊州一夢烟波遠。重來風物恰依然，愛日融  
融烟素卷。洞門窳歷鎖長春，異木槎枒插天半。霞衣冉冉  
娟東風，綠鎖窳前重識面。酒酣玉笋理琵琶，曲終依約含



幽怨人間名利幾時休馬足不駐空函恋桃花流水古犹  
今回首碧雲人不見

和荅德秀長句

摩雲標格儒林秀濯々美如春月柳毫顛文陣轟雷槌字  
勢龍蛇翻天矯才名藉甚燭景星卓然可獨尊南斗締交  
雲路許攀鱗談我諄々不離口層樓長記聳詩肩吟苦任  
渠朝瘦驚人險語骨毛寒元白危壇俱壓倒讀之真恐化  
雄虹按劍徘徊方敢造六丁收拾富巾箱貪夫探得人間  
寶暗中輕擲道途人相視誰論瓊玖報強搜斐句荅慙慙  
當恕人才有能否

古詩寄游良臣兼簡陳國鎮

藿豔與淺知無策謝絕歸來事清白乱絲心緒尚紛如時

對風簷獨捫虱會雖稽古補前愆赤水遺珠不难索仰公  
學問又日新磨礱幸偶謫仙人遥知談論到佳處眉間喜  
氣常津津我慚蹤跡浪萍梗欲親斐几嗟因循飛奴寥落  
絕問幅渴心依約生埃塵以膠投漆貴耐久回光借燭期  
知負情均骨肉非有素白玉琢成心始固莫學紛紛輕薄  
兒世情翻覆成雲雨登雲依舊高嵯峨指掌江山勝槩多  
佳眠夙物未入夢疑泛靈槎游絳河竭來乘興須一往飛  
觴爛醉橫秋波膺門况有金閨彥筆驅麗景森吟哦悠悠  
此志遂何日疑段相期踏雪過

良臣會飲于仙庄話次頗聞俗子訛訶次前韵自

解魚呈國鎮

鴟夷載酒神仙宅面作纈紋拚卷白飲餘指掌話平生冷



笑濡需同承瓦昆山片玉本無瑕洗垢癥痕任人索此中  
空洞貯天真何止容卿數百人但見婁公容唾面未應子  
路不知津會逢博物為鑒拔太阿拂拭寧目循男兒強項  
不易屈剪、羞他拜望塵席門車轍多長者雖不事、非  
長負意詳文贍諸儒慕紛、誰復班師固膏唇澤舌獵英  
華立涸宛如溝澮雨櫻冠門下謾栽、魯國真儒自不多  
何時解榻揮金枕陶然爛醉奚落河清狂浪語文字飲不  
須羅襪襯凌波芙蓉仙人酒量濶况有詩客相吟哦迎賓  
掃雪尚如何乘興扁舟須一過

遊政原有感

秋光淡薄磨青銅舞風霜葉魚腮紅鷄臙岑寂只不淺結  
客搯筇扣梵宮聯翻步躡孤烟際隴上淒涼一笛風穿雲

裂石声滿谷鷲飛鴈陣橫晴空高僧擁衲卧雲久諸方勘  
破心玲瓏我來多戶據禪榻堂、標格對臙公旋烹冰液  
破我悶澆腸七碗追盧仝水沈烟断香透頂津、喜氣生  
眉峯傅岳真隱已先去誰與壯浪吟爭雄朱絃從事奏流  
水俚耳知音亦罕逢不禁風物撩詩眼強作除語慙非工  
安得湯休占此景碧雲之句當奇鋒會沽村酒行蓮社忘  
歸一任夕陽春春

送吳教授古詩

公不見先朝謫仙李太白晦迹高山號詩客奇禽就掌食  
無猜藉、雄名振京國四明狂客素憐才解龜換酒稱奇  
持白衣漫此步花塲秀拔儒林人所則煌、文焰萬丈長  
散落人間伴明月又不見昌黎巨儒韓退之天才穎脫囊



中錐反利刻偽格以正取心注手無了疑橫徑太學明師  
 道質疑辨惑為著龜一言曲盡教育術業精于勤荒于嬉  
 赫然千載譽愈尊太山北斗誰敢欺二公才德冠天下青  
 史褒名卓難亞讀之每恨世不同操篲無由漸德化延陵  
 先生當盛時卓犖英姿獨繼之萬言倚馬亦何待睥睨諸  
 仙當並馳舐排異端志不拔真欲礪行參昌黎筆端倚靡  
 追造化宵中浩氣蟠蛟螭壯年唾手拾高第錦綉文章喧  
 帝里飄飄意氣凌碧雲回視塵蹤如脫屣危墀承命來臨  
 川絳帳談經歷數年微言奧義潛起於殘膏賸馥多流傳  
 搥衣幸與諸生列飲听緒言疑已決自嗟管見如醯雞若  
 非先生愛難徹惜哉虛往未宴歸洗心方擬扣精微夫何  
 瓜代忽尔至征航欲解扁王畿秋風未晚蓮吐香萼美鱸

肥正好嘗行矣景物供吟興剩摘佳篇投錦囊風月翰林  
 能繼踵此去禁庭當擢用傳聞紅葉滿階前久俟高才能  
 吟諷文章吏部既摩肩声聞行當冠日邊願為霖雨蘓民  
 望庶使螭頭壓象賢輒生荷德誠非淺別拜誰能無眷戀  
 惟蘄爵過二唐賢乃副承恩多士願

夢仙謠

良臣拉僕醉于臨川吳溪閣江山勝槩一目殆盡滿  
 飲巨觴惟恐告竭酒酣興發猖狂不知所如往爛遊  
 花柳適有奇遇洒然非塵土之境醒而思之恍如夢  
 覺噫浮生荏苒特一夢耳而于夢之中適有好夢焉  
 豈容于默々作夢仙謠以紀其盛事云知其夢者按  
 汝鳳蒸以徒韻否



寥陽洞口風烟好枯木槎牙出雲島重々金鎖透婵娟滿  
地落花常不埽蕭郎聞說已乘鳶空餘九轉燒丹竈烟霞  
截斷絕非塵凡夫蹤跡無由到高陽有客携佳侶訪異尋  
幽豁襟抱瓊樓飲散恣歡遊誤入蓬壺如夢覺雲閣初叩  
閒無人松梢鶴淚如鷲報須臾夕迎者誰吳宮女兒面  
凝脂指點蘭堂篆烟裊珠箔玲瓏罕地垂高擎翠袖輕々  
捲半露妖嬈素蓮臉嫣然一咲啟檀唇喚我躋堂語声軟  
相隨環坐一軒秋旋列杯盃供雅宴倚風仙藥似有情競  
吐芳苞噴香遠朝雲一段下陽臺綽約標容塵世鮮黛眉  
輕拂遠山青明眸斜眇秋波剪蘭柔柳弱不禁風睡起芙  
蓉香牀顫櫻桃緩啟歌貫珠夕陽花外流鶯轉曲終低語  
愈含情自許芳心由未展包藏惟恐泄真香尋常嬌怯羞

鶯燕為憐坐客俱多才拚羞試喜求相見安然若有惜花  
情願巧錦章鑄琬琰溫柔惠性已無雙更聽斯言真絕艷  
放懷卷白不暫停酷嫌鸚鵡杯中淺醉玉顏山卧倚窓秋  
水一床凝角簟悠颺好夢入巫峯洩々溶々只正濃遽然  
驚覺一何有點綴餘霞散眼封依約餘香雖滿袂行雲縹  
緲已無蹤壺中天地古來有默想風物遙應同我聞劉阮  
曾迷路武陵邂逅如花女靈丹咀嚼頓輕身脫洗紅塵已  
仙去又聞仙去有蕭防曾耦雙成飲玉漿一朝誤入華陽  
洞于飛終許學鸞凰仙凡異境無憑據每笑前聞但虛語  
豈意親逢事偶符始信人間有奇遇歸來燈火欲黃昏隱  
几無聊暗追慕濡毫試作夢仙謠端欲夢魂重默塑  
朝宗以詩見贈叙從遊之樂廣其意作古詩謝之



惠簡敦仁德秀

延陵有偉人遺我錦繡篇粲粲蕩醉眼煜煜爭春妍卷阿  
細考覈字字皆青錢知公太瘦生苦吟晞閬仙丹煨復  
鍊落紙人爭傳亦常慕坡翁汗漫如湧泉有時醉風月健  
筆揮雲烟冷飲味古昔詩話珍盈編嗤點寓深旨讀之心  
洒然公才本瑰瑋那復加雕鏤恥與俗吏偶杜門宗聖賢  
豈意闌茸輩辱公倒屣延傾蓋頓忘形披霧呈青天襟懷  
未易測醉中頗逃禪間亦不自揣効顰西子前驂駟超逸  
足駕駘烏能先但欲偷格律引玉時拋磚每荷不鄙斥珠  
璣貽我偏樽酒結詩社卓犖俱樊川風流王世子遠拍貞  
曜肩食蘆腸亦苦志操不少遷季子金閨彥高吟常醉眠  
四明有狂客解龜須見憐偉我二三友才名足聯翩休歌  
出無車休詠寒無氈得錢即相覓爛醉清平年排悶強裁  
句擺脫塵中緣風雲會遇自有日驪珠不到終沈淵公不  
見新豐旅人時未偶鳶肩沽酒洗塵垢謀猷一旦重朝庭  
始信男兒暫奔走

讀揭伯徹舊詩軸

劍氣光芒射斗牛劍池風物占清幽天教間出英雄士人  
獨推尊翰墨流幾為詩魔生太瘦常日清聖肆狂遊高吟  
逸軸成何事可惜升平謾白頭

寄周居安

周郎辭氣帶烟霞凜凜秋霜嚼齒牙塵尾動思談吐屑筆  
頭遥想夢生花三年幸獲芝遊款一別那知歲月賒遠奔  
飛奴傳輸墨顏筋柳骨儼秋蛇



秋試下即事有感寄國鎮

籬角金英噴異香  
杜門岑絕獨持觴  
風掀脫葉橫斜舞  
雲襯平林淺淡黃  
塞管有情增哽噎  
野花無緒伴淒涼  
不禁景物撩秋眼  
剩向新篇付錦囊

戲促朝宗酒約

兩收雲海湧金盆  
簾捲香絲破篆紋  
隻陸無心酬白壁  
十千有約醉紅裙  
哦詩誤許聯師服  
載酒真當過子雲  
待遣秋娘呈妙舞  
春衫已把水沈薰

朝宗和復次韵荅之

酷愛傾銀注瓦盆  
醉眠蘄簟展波紋  
尋春倦躍青驄馬  
訪異同拖白練裙  
謾記寫牋塵几格  
要看象管埽烟雲  
錦囊拾得詩無數  
一炷沈烟透甲薰

約吳公美裴季駿同赴會次前韵

伊誰汲井旋埋盆  
喜見荷錢點浪紋  
小立不妨人解佩  
閑眠應有客書裙  
未饒靈運吟春草  
端憶長庚醉莫雲  
願我芝容尚無躁  
韓公何惜為三薰

春日書事

寂々園林照日遲  
花梢徑雨漫胭脂  
輕烟薄縠籠深塢  
細草援苴蘸小池  
暖力着人添醉聖  
韶華入眼逼詩脾  
賞心不惜千金價  
冷咲間閭教米炊

春霽

繡出園林霽色新  
長郊芳草綠無垠  
日籠瑞氣輕浮幌  
風掠花芬暗蔽人  
蝶慕窈香爭趁暖  
鶯思求友競啼春  
試將何物澆詩胆  
活火調湯澣玉塵



臨溪弱柳

柳弄嬌黃暖律催  
臨溪約畧咲殘梅  
鴨頭春水回環綠  
龜甲屏山掩映開  
媚日依依籠霧閣  
搖風裊裊拂烟梳  
柔絲恨不同攀折  
獨立江岸首重回

過般若寺納涼

火雲亭午欲燒空  
避暑聯翩過梵宮  
磬韻喚回蝴蝶夢  
巾紗立破芰荷風  
竹林道客欲長往  
河朔高人與未窮  
誰似湯休能瘳病  
索詩吟咲慰相逢

原上晚步聞笛有感

一笛誰橫透晚空  
傷懷真作鳥窺籠  
解龜換酒無知己  
拾穗行歌喜屢豐  
沐雨秋山遮眼碧  
舞風霜葉點溪紅  
老農植杖來相問  
藉草高談夕照中

遣興示子賢

安貧萬事祇隨緣  
羞澁囊空乏一錢  
濁酒難賒應有恨  
焦琴屢典已無絃  
飯盂抄雪唯求飽  
茗盃翻濤喜自煎  
錦里先生有詩卷  
破愁時誦兩三篇

傅岳居士挽詞

夢寐江湖僅十年  
桑榆投老遁林泉  
知人襟抱藏英鑒  
竒我風標喚謫仙  
妙論粲花今已矣  
遺編戛玉尚依然  
桐焦里巷知音少  
幾對雲齋欲斷絃

遊盤龍沙傅岳有感簡朝宗

招提清曠蜀來游  
滄墨嵐光眼界幽  
黃絹碑亡思子禮  
碧雲詩好憶湯休  
夙簷目送書空鴈  
烟塢愁聞喚雨鳩  
銷燦睡魔澆茗盃  
矮甍拾得一簷秋



陳欽若時寓盤龍作詩寄之因紀吟咏之美

凜凜冰霜嚼齒牙沈沈清夜詠簷花  
摩雲氣逸干星斗落  
紙詞妍帶綺霞醉掃麝煤奔渴驥  
困行象管引秋蛇擬尋  
紅樹賡詩社却日揮戈不許斜

良臣聚飲梅仙庄和多字韵

牛羊茁露綠駢羅几載鳴夷得趣多  
塵尾談清爭嚼麝筆  
頭草小換龍鵝杯行自鄙紅裙飲  
詠罷人傳白雪歌採摘  
溪山覓句法倚風拾得只長哦

讀傅岳居士舊詩軸有感

黃鵠凌雲不可尋遺音流落感人心  
朱顏綠鬢固難駐明  
月清風古到今韞積有時驚下璞  
絕絃無地置牙琴傅岳  
蕭瑟傷心處一局文楸鎖竹林

諸友乘興拉謁吳朝宗因次韵

扁舟乘興叩寒門閉户先生不讓孫  
白雪郢人親到耳青  
天廣客迥披雲吟行牛渚裁佳句  
坐對雞窓嗜古文淡泊  
交情俱耐久幾多瀟洒寄琴樽

朝宗見和復次韵謝之

拾得佳篇李賀門鳶箋重錄教諸孫  
清于月夕瀟湘水淡  
似清秋太華雲  
茶葉例雖賸  
雷馥鈎深應寡典元文何時  
紅樹尋詩社琢句令傾漱灑樽

歸途遣興借朝宗韵簡敦仁

緩着歸鞭水石鄉息鞍箕踞小橋傍  
烟添竹葉雙叢玉秋  
着蘆花一岸霜  
添眼溪山增爽氣  
韻人蘭蕙破幽香  
擬捉吟筆扛洪鼎反咲蚍蜉不自量



白鵝橋復用前韵

旗亭解轡詠江鄉  
屬玉雙飛綠澗傍  
水墨園林初過雨  
青黃橙橘未經霜  
鼎烹雲液澆腸  
爽甕搯春醅  
破鼻香回首  
謾驚烟水遠  
向來清味怯思量

遊華嚴寺題誠齋

欲处三伏叩禪關  
淨洗煩襟水石間  
熾景碧雲俱掩斷  
涼颼綠竹頃招還  
龍涎一炷香清骨  
琥珀盈樽咲解顏  
預約高僧名遂日  
結茅來此伴長閑

和顯道筠軒有作

欲引秋声竹旋移  
吟烟時一啟柴扉  
了無俗物迷青眼  
每輕有風韻客衣  
地僻不知炎暑老  
身閑替覺道心微  
芒塵事俱減  
穀羞偶問問較是非

和顯道借韻書懷

投老歸休六逸溪  
杳無闌冗敢敲扉  
紅藤舊策扶危杖  
白苧新裁養素衣  
落紙詩才增綺麗  
揮犀禪語愈元微  
無心深得烟霞趣  
冷笑人間萬種非

借前韻書懷呈顯道

結茅高隱倦奔馳  
寂寂無人叩竹扉  
快意未能榮駟馬  
寧親且爾戲斑衣  
躡雲騰踏終當隱  
釣渭栖遲豈久微  
洗垢索瘢何足卹  
爍金衆口任人非

和世弼醉題顯道筠軒

北窓高隱傲羲皇  
旋種琅玕列砌旁  
端許鸞凰同道載  
不容燕雀亂翱翔  
侵床綠蔭宜欹枕  
拂袂清風快捧觴  
好是雨餘良夜午  
夢回添得數分涼



和世弼蓼花

粧點千叢醮碧流寧甘淡守對清秋白蘋許共搖風細黃  
菊欣同占景幽羞世異香招舞蝶獨施繁艷伴漁舟惜騰  
醉眼牽情處贏得淒涼一段愁

和世弼雞冠花

芳名從古號雞冠赭醴醒然恰一般不語宋牼何足賞難  
通西谷謾勞看倚風縱有如丹頂遇敵應無似錦翰空費  
栽培汚庭砌到頭不若植芝蘭

宿世弼書館

暫向雲齋借榻眠窻風一線晚秋天淋浪樽酒狂搗句點  
閃檠燈伴論禪盤角竹聲時浙瀝簾旌挂影弄嬋娟話窮  
依約方成夢驀聽疎鐘到枕前


謝人惠紫竹杖

王猷珍重惠龍孫策險扶危價莫論爛醉懸錢遊酒域狂  
吟步月打僧門虛心尚有凌雲操勁節元無染淚痕寄語  
香山居士道朱藤芝此未為尊

招顯道世弼飲

桐圭飄剪近重陽菊綻籬邊葉々香雲破晴空書鴈字雨  
餘沙磧列駕行賞心擬結東山會卷白交飛北海觴爛醉  
眼封多勝槩一時收拾入詩囊





编码错误

卷中



歐陽修撰集卷五

宋 歐陽澈 撰

飄然集中

顯道辭中以詩示教因和韻復之

拋磚斐句試相招遠辱高軒過寂寥教約荷公能發甌功  
名斬我効題橋談霏玉屑驚人聽歌和陽春滿坐謠投轄  
苦留留不住歸時明月掛璇霄

重九日醉中與世弼遊華嚴寺

撥雲來謁野僧家刮眼秋光望裏賒檻菊凋零金蕊碎庭  
花裊娜玉冠斜有白雞冠盛開遣懷詩筆摘春錦破悶茶甌捧雪  
花却笑遠公延靖節何須把盞醉流霞

和前韻紀登高醉中景示世弼諸友



區月不才  
芳晨秋興浩無涯結客凭高酒旋賒送目喜觀雲縹緲狂  
歌誰顧帽歌斜笑他子美看黃實要學樊川插菊花競說  
今年幸逢閏丹期携手躡烟霞

世弼再和見贈又次韵復之其詞皆闢其詩中之  
語

功業未能光史冊醉吟且爾會朋遊潛心深造詩書府摘  
句蘄驚翰墨流莘野耕烟須釋耒蟠溪釣月暫乘舟風雲  
一旦逢知己直取三公位黑頭

三尺絲桐追古意一牀文史伴閑身寧甘岑寂配前哲羞  
逐紛華溷世人遵轄喜投延上客萊衣時戲奉偏親由來  
善惡如水炭記迹於今動擇鄰

世弼和酬因繼韵以贈之

快意不憂原憲病脩然常作子長遊胸中氣焰摩星斗筆  
下辭源倒峽流閔子家風惟吸水龜蒙活計在漁舟杜陵  
太瘦多詩苦白雪無情已滿頭

擺除塵網縈纏累占得壺天放曠身世業文章俱拔萃家  
傳清白耻求人鼓琴顏巷貧而樂裹飯桑門淡以親聞說  
甌塵雖屢矣不甘貸粟向諸鄰

是日天氣乍晴頗快人意因和韵拉世弼謁傅岳  
風剪梧圭欲曉秋溪光山色稱惟遊聯翩雲水宜搜異俛  
首閭閻耻溷流相視悉皆謀按劍無心誰復似虛舟紫芝  
眉宇人中瑞一日常思一聚頭

抱襟帽角走紅塵可咲崎嶇一病身試拉竹溪山裏侶去  
尋廬阜社中人

傅岳晚年學佛得趣

鮑昭俊逸雖難敵夷甫風流幸



許親鷄黍尚為千里會况茲咫尺接牆鄰

和子賢對景有感次九日韵

醉撥春雲一壘香潛欣積雨破秋陽燈龕宜入詩書府錢  
杖慵吟水石鄉忘憲不班潘岳鬢養恬難斷廣平觴賞音  
誰謂無蕭穎時綴雄文弔戰場

建中覓菊於希詰因戲作四韵寄云

丐菊東籬帶晚烟持觴獨放竹溪仙擬携賡唱社中侶未  
伴沈酣市上眠清叔能詩曾不速廣文嗜酒恨無錢倘蒙  
閉戶轟同飲一斛豪頭也百篇

和韵戲索建中和詩

功名未許冠凌烟琢句投囊學閬仙韞玉要令神物護探  
珠豈待老龍眠賓王頗欠新詩債子美回償舊酒錢自古

逸才多滌器醉來宜洒奪袍篇

傳巖小酌於草堂因繼前韵紀贈岩叟

遁哉雲岩古景幽烟霞常伴赤松遊陶令經醉窮千古落  
落談超貫九流眷愛猥蒙常倒屣追尋常欲掉扁舟絲桐  
古調無人識每辱知音為點頭

磊落曾襟造道真江湖十載自由身雖無偉績留當世却  
有清名異衆人角里先生常願友香山居士每求親摠衣  
願我雖幾數賴得詩翁誘善鄰

世彌讀白樂天放言詩做其體依前韵作数首見

寄因和荅之亦做樂天之體

如簧巧語何須聽似海侯門豈足遊太華崇高無棄士滄  
浪合并納纖流未要季子榮親印已買陶朱佚老舟藏器



待時須大用，恥爭蝸角與蠅頭。

駟馬華軒終得志，筆瓢梓茹且潛身。隋珠莫彈排空雀，和  
璧休投按劍人。畫史解衣須遇鑑，齊門鼓瑟信難親。索瘢  
洗垢從教謗，深雪襟懷典道鄰。

博鵬休笑蓬蒿適，燕雀豈知鴻鵠遊。顏跖賢愚終莫域，渭  
涇清濁自殊流。便長方可探深井，水淺安能泛大舟。獨愛  
天樂吟着句，輸贏須待局終頭。

言行樞機宜慎茲，利名韞鎮苦萦身。無非市櫻金客誰  
似臨畦抱甕人。鴻鴈兄弟猶列序，虎狼父子尚相親。刀錐  
不用爭蝸角，請學當時鄰。

世弼原上晚望和韵見寄因復之

綠消暮靄滿空秋，念遠凭高隴上游。一片孤雲生遠岫，數

聲斷鴈落寒流。風前無緒愁聞笛，天際何人誤識舟。步月  
可尋岩下叟，試將圓玉鎖神頭。

鳩杖吟行笑撥雲，我疑賈島是前身。名高鄭谷耕烟叟，樂  
過巖灘釣月人。俯聽鳴蛩爭唧唧，潛窺宿鳥各親親。田家  
有秫俱酒，乘興何妨遍訪鄰。

明堂赦降改名者例許入學世弼和前韵賀余次  
韵荅之

勅書夜到釋幽囚，朝野懽聲例快遊。雷、庶官咸被澤，踰  
踰多士悉承流。躡雲思獻安邦策，釣月慵尋泛宅舟。寄語  
淮陰休笑我，乘時措日跨龍頭。

太平聖主就如雲，廣露殊恩及此身。声類春雷潜起蟄，光  
同秋月溥臨人。網羅遺逸考求助，旌表門閭獎事親。猥辱



錦章慰岑寂借冠終不許鄉鄰

顯道和前韵見贈因復之

咳唾珠璣世所優執鞭願我幸從遊瓊枝不棄蕪葭倚鯨  
海能容溝瀆流月夜狂吟揮象管花時爛醉泛蘭舟錦囊  
辱擲新詩格高壓唐朝李杜頭

清名借甚伯夷倫抗志孤高不辱身縮手懶伸堯殿策拂  
衣歸作傳岩人荷公每許青雲器斲我歸榮白髮親努力  
須知所祝庶令雪恥見南鄰

顯道庭中有白鷄冠花爛熳作雲容狀賦庭中瑞

氣詩以寄余次韵

雲湧庭中翦異葩紛紛郁郁叠輕紗觀光雖屢經群目薦  
瑞由來慶一家雨洗晶瑩飄玉葉烟滋淡苧簇瓊花多應

綽約東鄰女來伴仙翁咀絳霞

裊雲挪容獻瑞葩曉雲輕罩認籠紗喜施繁艷迎詩客羞  
寄清香入酒家妙質本能兼五德芳名今復冠群花可憐  
一種婬娟態醉倚秋風臉有霞

夜讀元容良臣登雲閣上舊軸因走筆作詩以寄

二公

登雲閣上二詩仙不共凭欄僅一年耳冷高談增企仰目  
驚健筆憶攀緣按藍環翠應依舊轉轂流光已屢遷祇憶  
醉吟風月處數竿脩竹帶輕烟

寄良臣

耐久交情古所難松筠高節實能攀弗思小怨心懷恚惟  
嗜狂吟咲解顏說口任教華似錦忠言到底臭如蘭醜態



不識奇男子窺管徒知見一班

題道世弼過敝廬小酌醉中題道以詩見教和謝

鳩杖先生過草萊竹林結客咲銜杯盤堆冷炙非珍饌樽貯香醪旋潑醅玉屑揮犀談綺吐纈紋入面醉顏開自慙闡茸親餘論健筆時觀吐鳳才

漠：陰凝水墨天雨絲成陣拂窓前千層疊獸籠輕靄一帶澄江鎖淡烟歸思似雲空散亂名蹤如繫尚留連當時錯咲悲風賦今日閑愁頓黯然

寄題章澤民二軒二首

寓意標名氣象雄快哉豈為一襟風端期驥子窮經敏早向蟾庭射策通奔逸佇當躋捷徑棲遲暫此寄塵蹤過門大嚼徒虛語未若蘭芝志不同

快矣標名厥趣高端能教子振風騷塵揮捷辯重馮席筆洒新詩奪宋袍冷咲三技方鑿玉雄圖一釣便連鰲行行指點青雲步烜赫英聲冠譽髦

讀余逢辰舊唱和詩

括匠居鄰劍水傍筆端疑化劍鋒鉞雕鐫麗景春工巧煨煉佳詞武庫張字：泓澄清如月篇：耿介烈含霜樓成白玉歸天府擲下珠璣滿錦囊

謁希括不遇軒上走筆

一軒虛敞靜無塵笑揖遙岑作主人興似子猷來訪戴情同荀鶴誤尋真重披藥錄聊忘倦側聽蟬吟試與神賴得好風和我意幽香拂掠襲衣巾

和希喆軒上韵與友遊華嚴五雲峯



國朝仙才集 卷五 六 鈔本  
劍戟峰攢迥絕塵捫蘿宜謁社中人雖無樽酒邀元亮恰  
有清談敵季真漱玉泉声清洗耳霽雲香縷靜願神支公  
況是忘形侶不訝林宗折角巾

題良臣登雲閣

翬飛高閣勢凌雲端擬雲衢致此身直躍魯梯千尺峻高  
攀蟾桂一枝春廓然眼界同霞域快矣襟袍絕點塵髣髴  
麻姑亭上景方平應約此相親

丹檻崛起拂雲端平步危梯入廣寒脫屣佇當騰鶴馭飛  
鳧終擬附鵬搏半天風雨凭欄詠萬里江山指掌看十二  
樓臺多勝概慚無詩思翦裁難

和人題會仙樓

朱堯飛峻勢凌烟卷白樓中志謫仙枕麴頓能逃外果漱  
醪端欲繼前賢雲屏環列蓬壺境花錦均鋪水墨天滌濯  
吟魂強裁句詩成冷笑滿囊錢

秋日山居八事

謝絕紅塵萬種非杜門却掃下書幃聖賢若許同仁傑子  
弟從教詆竇威反覆始知經旨遠沈潜愈覺道心微自慚  
聞見多迂濶何幸慈親屢斷機右讀書

親灌蔬畦慕漢陰不辭抱甕汲泉深擬為元亮蕭條處豈  
有樊遲貨殖心別去荆榛俱絕蔓栽培桃李已成林兔葵  
燕麥元荒寂剗地繁華直萬金右治圃

霜刀頻洗碧琅玕半畝清陰透膽寒為去殘枝歲毒虺端  
留密葉隱鳴鸞荒榛雜揉尤宜剔直節堅剛豈忍殘擬倩  
蕭郎揮妙筆一時收拾畫圖看右洗竹



因傳種法自東坡潛喜春來沾者多不遣牛羊殘物性更  
資雨露養天和虬枝終擬棲仙鶴雲葉行看施女蘿從典  
蒿萊暫同植大夫對寵竟輸他右種竹

振衣拂曉啟松扃月淡風輕頓酒醒密竹含烟爭滴翠幽  
蘭泥露遠香清憐高潔蟬嘶柳間羨優游鹿食苹試聽

碧流端洗耳白雲深處誦黃庭右早起

一抹輕烟鎖遠山眼封瀟灑脫塵寰投林宿鳥相喚出

草飛螢自往還吟擬停杯邀月飲醉斲支枕伴雲閑因風

拾得新詩句獨倚高梧咲解顏右晚望

灑落風軒枕簟涼高眠停午夢何長轉為蝴蝶徒虛語遊

遍華胥祇妄狂喚覺始驚俱幻化勞生頓悟謾乾忙搔頭

斜倚屏山久孰較無如醉玉漿右書眠

景鋪萬籟絕紛華獨泛瑤觴襯臉霞飲罷仰天歌白雪醉  
來啟匣拂青蛇伴邀佳客推明月樂奏清聲有亂蛙欲學  
廣文事高節恨無細雨落簷花右夜飲

和友人榴花

薰風吹綻絳香囊碧玉叢中巧剪裁剛對炎曦爭灼爍羞  
同凡卉競芬芳動人來把驪珠吐照眼潛將蜀錦張詩思  
為伊牽引煞暗隨蝴蝶夢池塘

寄良臣

耳冷清談倏半年渴心如憶嶺頭泉自慚托跡多南北無  
復從遊學聖賢莫謂卑飛同斥鷃已全高潔慕鳴蟬荒涼  
不厭幽居趣假道何妨試着鞭

子賢同遊岐原



投閑結客叩禪扃拾得林間一種清倚杖細聽黃鳥語捲  
簾遙指碧雲生清風塵尾驅塵態春露甌心破宿醒便擬  
躬耕傳岩下翻慚沒世未留名

和友人春日山中即事

斂翅歸來口欲絨結茅遁戢寄嵌巖鞫軒聒耳弓彈薜

茗閑咲蜜蜂空採撲野聽鷓燕語呢喃俯然頓

釋人間累設穿維防餓虎饒

杜門却掃絕機緘砥節端如萬仞岩澗底無鼈休擲釣路

傍有草倩誰芟披襟嫩竹敲風細支枕幽禽鬪語喃底事

曉來無挾彈為嫌屋上集烏饒

和友人同遊普安

碧雲章句慕湯休結客來尋物外遊茗椀翠濤能破悶棊

枰飛電共忘憂須臾况味叅師正愛竹襟懷亞子猷好事

不須沾酒引一溪風物自相留

拉友人遊普安追和前韻

炙手權門似可羞聯翩宜作赤松遊花逢消恨本無恨草

對忘憂自不憂拂榻禪窓蠲俗慮揮犀虛室論嘉猷支郎

况頗能詩活滌濯吟魂為少留

督德秀還酒會

綠鎖窻前聚首時戲彈圓玉偶輸機侑觴既欲携紅袖送

酒何妨遣白衣醕酌預期歸倒載芝容端約話元機揮戈

直使頽陽都不計西風隱半歸

德秀和詩意似有激而云因次韻復之

困路無塵未偶時醉吟風月且忘機囊空不羨千金璧道



在何慚百結衣洗垢任他騰口訪養恬尤覺道心微孫陽  
一顧鹽車驥起逸方驚動中規

朝宗雨中醉歸為娼女竊笑戲作兩絕因繼其韻  
雨裏輕塵步武遲墊巾歸士武陵溪紛々誰認神仙過拊  
掌瓊樓笑女兒

襟袂龍鍾破雨歸玉人驚笑若耶溪恨無款段馳春景故  
故遺鞭盼阿兒

臨川戲留友人

山童澤涸欲金流小雨廉纖陟變秋河朔飲徒方快意鱸  
魚歸興不如休歌殊況有飛瓊侶結客當為擲果遊一曲  
陽關腸盡未應聞此不遲留

小生日因與友人作文字飲醉中走筆

翫醴無聊獨倚門誰憐跨下有王孫揚鑣特奪過涼憲載  
酒端來醉子雲寫景錦囊同摘句搖風玉塵細論文共欣  
賤子當生日戲祝遐齡倒一樽

二妙高軒肯過門共朝獻策學公孫因覩佳句題紅葉徒  
起歸心望白雲坐上揮犀驚險語醉中染翰綴雄文相忘  
豈假投遵轄待月同傾北海樽

夜過謝池小酌戲繼前韻示諸友

為憶蓮娃夜叩門恐緣芳草怨王孫眉彎海嶠初生月鬢  
躡巫山欲墜雲金粟花殘將委燼香絲篆破不成文朦朧  
月映人如玉爾汝忘形共一樽

德秀和韻見酬因復之

高才卓犖冠儒門知是延陵幾世孫白雪歌詩凌鮑謝青



錢事業歷機雲雄圖未遂羞投筆賦分甘貧恥賣文已結  
忘形韓孟友醉吟常願共開樽

繼前韵督敦仁和詩

搢衣幸每躡膺文了、慙非孔氏孫塵尾既容聞吐屑毫  
端合許見摛雲羲皇已况傲彭澤屈宋安能過廣文白璧  
一雙如見擲解貂准擬換融樽

八月十四日夜建中二三友過我清話因起把盞  
賞月從容笑談不覺雲容朦朧桂影淡泊端知來  
夕聚首騷池再偕佳會遂成四韵

冰輪初訝一分虧結客傳觴笑語遲雲漢無端歲兔影金  
波恨不蘸蟾枝佐樽痛憶飛瓊侶染翰裁成感鬼詩料得  
中秋月應朗習池端約捧瓊卮

軒前菊蕊將綻因書四韵示希喆約九日聚飲於  
此

菊英裝點近芳辰風掠清香已散人端的樊川携玉液來  
同靖節賞金塵歲閤戲賭杯中物投轄堅留坐上賓惡客  
不容汚我社摛雲要掃筆鋒神

述懷寄仲寶

雞窓俛默謝塵囂炙手權門懶折腰節操剛持忠孝礪骨  
襟常以古今澆蕭條陋巷閑三徑牢落生涯寄一瓢何日  
高軒邀我過竹林清集共逍遙

過巴川

凭高因賦遏雲篇曳屣狂歌放昔賢未遂相如榮駟馬且  
尋師正傲清泉悲吟玉未經三獻羞澁囊空乏一錢典却



春衣常獨酌從教邸主笑為肩

和子賢借韵書懷

白雪歌詩數百篇賡酬樂有父兄賢要希靖節栽門柳須  
俟參寥夢石泉咳吐幸存三寸舌文章可愧一囊錢會須  
重吟高軒過嘔出蘄攀李賀肩

和前韵勉子賢學詩

雕鐫風月摘佳篇落筆尤宜法古賢淬礪要如礪寶劍清  
新蘄似冽寒泉會同白句吟披錦冷咲邕文賣得錢詩社  
獲公添一瑞苦思須拍閩仙肩

子賢和韵見酬次答之

詩名浪得在盧前器識慙非叔度賢捉月咲他吟采石凌  
雲端欲賦甘泉發劄喜淬衝牛劍啟齒羞談使鬼錢平世  
未應徒爾耳行藏終與古人肩

夏日郊亭和尚書韵

關、啼鳥樹交陰雨過西城野色侵避暑誰能陪劇飲清  
歌自可滌煩襟稻花欲秀蟬初噉萋萋方長水正深知有  
江湖杳然意扁舟應與共追尋


和子賢秋日晚望

溪山潑墨水雲秋似綺餘霞次第收燦、拒霜鋪蓼岸雙  
雙屬玉舞蘋洲杳無錦字來憑鴈擬滅機心試狎鷗望裏  
碧雲還又合數峯江上忍擡眸

朝宗以詩贈行和酬二篇一以留別一以謝詩

救酬常共醉淋漓魚目暫遊漲海傍琴聽雅音彈碧玉鼎  
分靈剗煉元霜纏腸錦繡篇章麗入室芝蘭燕寢香以別





编码错误

卷下



未應徒耳耳鵬程萬里事難量

憶朝宗

飲聆舌鐸向鷄窓深媿兼葭倚玉傍妙論乍擣人吐屑渴  
心欣破橘含霜頗多好景撩人咲獨賞幽叢樸面香數筆  
江山吟未得何時對榻細商量

寄敦仁

高才松桂振芬芳桃李根莖媿托傍眩目文章舒麗錦起  
群節操抗巖霜快龍未卜聞談綺補劓期攀靄德香時遣  
長鬚致雙鯉新詩無惜屢思量

歐陽修撰集卷五

歐陽修撰集卷六

宋 歐陽澈 撰

飄然集下

建中索子賢酒債戲作一絕

阿堵物無崔烈臭孔方兄有少陵羞一斗酒金債未得速  
來相就典貂裘

瓊上人留意學詩惑于多歧未明厥趨作四韵贈  
之了此一話則能詩三昧不出箇中矣

襟懷磊落富詩情琢句端明法頌聲格健要除蔬笋氣語  
工須帶雪霜清碧雲矜式存風雅黃卷沈潛學老成鍛鍊  
更能師島可禪林無患不知名

秋香



國朝仙集  
卷六  
一  
鈔本  
拂掠輕風破異香非蘭非麝味何長  
荻節玉屑飛魚舍菊  
碎金塵點醉鄉露衰木犀增馥郁  
烟滋菡萏益芬芳  
佳人惹得盈襟袖  
剗地慵拈錦繡囊

秋雲

數片悠揚出遠山  
擬為霖雨霈塵寰  
未乘風馭吹嘘便  
驀被曦輪照燦還  
心在蒼生常欲起  
蹤歸深岫暫投閑  
油然一作施膏澤  
始趁朝烟入帝關

秋竹

森然庭列碧琅玕  
瀟洒清陰透膽寒  
落已成棲鳳寔團  
團俱是化龍竿  
夜深節月疑金碎  
曉色籠烟認戟攢  
勁節劉持君子搯  
王猷休把等閑看

待月

停杯邀月宴華堂  
苦恨山高阻興狂  
海嶠豈能藏素魄  
雲衢終自布寒光  
須臾簾捲銀蟾影  
次第樽浮桂子香  
正好吹簫恰無月  
姮娥應見我恓惶

秋月

碾破鱗雲皓月輪  
銀蟾著意露精神  
十分素魄高低印  
一樣寒光遠近均  
觸目冰壺無點翳  
照人水鑑絕纖塵  
擬携玉斧乘風御  
折桂歸榮白髮親

金鳳花

巧剪金英似欲飛  
恍疑平世鳳來儀  
嘉名獨冠群花首  
底事君王尚未知

秋愁

層樓夜午轉西風  
眉際新愁剗地濃  
怪得當時潘典宋  
淒



涼尤怯此時逢

喜雨八絕寄顯道作

陰雨蕭蕭、夜接晨如雲禾稼一番新  
康衢繫壤歌聲沸樂歲應無甑裏塵

滌破驕陽變早秋烟光清照壯山幽  
五湖遙想增瀟洒誰棹扁舟繼蠡遊

浮雲誰謂出無心甘雨祁祁潤澤深  
潭底老龍徒久臥亢陽何事不為霖

雲崑蕭索雨初晴嫩玉寒泉分外清  
可咲蜩蟬時快意也依濃蔭吐微聲

畫圻田廩久望雲霈然膏澤幸盈津  
南鄰來慶年豐稔旋酌香醪共濕唇

北窓支枕夢初回風掠餘香特地來  
顛倒衣裳望地上荷花無語為誰開

霜筠瑟瑟夏琅玕冷透紗幮一味涼  
破夢吟魂正瀟洒纖纖更棒雪花香

楊柳藏鶉菡萏香水亭風榭罷羅裳  
秋光正入詩眼人剩得餘篇付錦囊

醉吟

酒酣逸氣射星斗自恨無人識馬周  
試拂青蛇歌易水溪山應有鬼神愁

重九前一日對菊戲書

菊吐金英已滿籬持杯指準賞芳菲  
有巾可漉還無釀載酒何人是白衣



讀蕭防遇仙傳戲書一絕

華陽宮闕杳難尋  
空有遺蹤古到今  
不識蕭郎仙去後  
床頭花醞共誰斟

覽丁渥異夢記戲書一絕示內人

夢魂千里入巫峯  
况在鴛幃咫尺中  
筆洒新詩宜贈我  
臨風幸免倩征鴻

德秀和朝宗絕句意似有不平者依韵作三絕以代其解嘲

琪管將揚世罕知  
不辭三弄試臨溪  
少陵若也能精鑑  
休戲巖公有此兒  
巖罷韜光以待時  
扁舟且此釣蟠溪  
挈雲指日掀頭角  
驚破扶風狎侮兒

東野流臨喜賦詩一竿  
搖破碧雲溪  
汝非羸角休吾不觸  
是尋常草角兒

和元詩末篇之意二絕寄友人

功名未許書麟閣  
吟醉何妨晦竹溪  
舌在自知非久困  
且將詩禮教龜兒

酒聖會須中北海  
機鋒誰敢觸曹溪  
朝宗坐多談禪  
英雄自有回天力  
造化都來只小兒

歸自臨川途中感物遇事八絕句寄秀美

信馬沿堤懶着鞭  
不堪回首望臨川  
滿懷离恨春如夢  
愁聽林梢斷續蟬

欲破閑愁殢舉觴  
醉中行色轉淒涼  
眼封無物堪遣望  
盡江城斷盡腸



廉纖小雨破炎蒸  
馬上襟懷頓覺清  
暫解征鞍訪村叟  
一甌春露醒餘醒

一声啼鳥過殘陽  
鬢流鬢促曉粧  
記得年時倦梳裏  
人含笑道天涼

寸碧遙岑隱半規  
水輪次第碾琉璃  
因追勝集瓊樓抄  
倩纖纖捧酒卮

批盡寒燈夜欲分  
襟懷岑寂向誰論  
香殘讀徹閑歌枕  
鬢音容入夢魂

秋唧蛩吟旅况凄  
那堪孤枕酒醒時  
夢魂栩栩知何處  
依約幽軒話別離

窓含月影夢初回  
一枕淒涼眼懶開  
幽恨閑愁本無種  
根苗不識是誰栽

有寄二絕

標格全歸笑靨中  
相逢無奈去匆匆  
金釵若許重尋約  
樽酒秦樓願與同

情騰醉眼漾嬌波  
心印潛通一捻多  
密寄斷腸雙麗曲  
過雲須倩雪兒歌

和子賢途中十絕

情騰醉眼未全醒  
厭聽車鷓達旦鳴  
款段踏穿楊柳月  
快人拂面曉風輕

暫停雙槳傍蘋洲  
磯上漁翁雪滿頭  
釣破烟波深得趣  
生来不識世間愁

凉飈未奪火雲權  
燥石炎曦勢欲燃  
妄意擬尋河朔飲  
狂歌爛醉太平年



旗亭貰酒醉淋漓，贏得林間一味涼。倒着接羅還信馬，只憂溪徑似羊腸。右沽酒

巴陵峯嶺試躋攀，勝槩全歸指顧間。咲倚松風聊洗耳，隔雲好鳥語間關。右到船上

麟閣功名屬少年，咲他皓首只翛然。聞名雖未披雲霧，勉力期攀魯仲連。右寄談溪英

索寞襟懷不奈秋，雕鏤佳句且忘憂。行、恰過橋南路，一片蘆花映碧流。右過橋

黃梁餐罷倚危亭，茗枕瓊花助解醒。旅况吟魂正瀟洒，拂鞍迤邐又登程。右飯僕

桐圭柳帶正凋疎，匹馬區、倦遠途。腸斷不堪回首處，寒雲影裏雁聲孤。右有寄

寄陳國鎮五絕

德香薰郁書銀筆，句法清新奪錦袍。卓犖斗南推第一，才名籍甚繼三豪。

才華拔萃東南美，氣焰凌空表裏清。莫逆於心蒙許友，攀鱗鴈塔要聯名。

未觀健筆龍蛇走，拾得殘編綺思新。語帶烟霞含勁氣，解龜誰醉謫仙人。

鼇頭簾捲溪山秀，塵尾風生議論清。解榻何時同一咲，密雲旋煮破餘醒。

冷暖世情諳已熟，雌黃輿議厭常聞。龜囚蚕縛末由脫，樽酒何時典重論。

和荅國鎮五絕



仙風入骨楚臣騷消得明皇賜綉袍  
哦就新篇神物護未饒禹錫擅詩豪

年時煮茗共敲冰深雪襟懷一種清  
回首舊遊渾似夢翻慙困路未知名

十圍便腹卧邊先咲傲曦皇仿昔賢  
詔下好須同奮躍槐花香裏走連錢

學辨癡龍信博哉風流夷甫更多才  
擬聯石鼎彌明句對聳詩肩夜拾煤

吟鬚輕撚對斜陽葉埽平林夜着霜  
忽領詩詞雲錦段夜光明月耀黌堂

寄游良臣五絕

螢牕願我絕常編斫節思春叔度賢  
誰念廣文窮到骨傾

囊時典杖頭錢

闌茸閭閻數米炊耳根輿議噪蛙卑  
那知別得琴中趣五

斗由慙為折枝

壯浪年來筆有神詩如開府頓清新  
暗中慎莫投珠璧道

路無非按劍人

登雲勝槩脫風埃頓費詩仙賦詠才  
憶得年時共轟飲羅

衣曾暗裛香煤

文會何時聚德星紫芝眉宇照人清  
錦韉並控尋春馬持酒憑花為解醒

飲中示子賢諸友七絕頗愧狂斐

時來一釣會連鰲舌在誰羞舊緼袍  
風骨自慙非太白高吟大醉浪推豪



江陵素乏橘千株貧甚唯收柿葉書擬叩富兒謀貸粟及門無奈足趨起

鍛鍊新詩數百篇郊寒島瘦慕前賢高山流水知音少不及人間使鬼錢

飄逸氣薄雲霓劫烈羞談管仲卑翫葉凌烟終有分桂林誰謂便無枝

袍襟帽角走紅塵却掃窮經務日新將相公侯本無種未應不及賣漿人

功名端擬位三槐發策慚無八斗才寂寞雲齋且稽古披香指日掃松煤

不作群兒浪謗傷致身蘄處諫臺霜功成野服便蕭散會見裴公綠野堂

春意五絕

濃雲漠漠雨毛空染出桃腮照眼紅著莫異香飄几席多情拂掠謝東風

高情忽逐曉雲空喜見枝頭一點紅祇恐好花俱有主擬為詞客伴春風

料峭餘寒透袂衣卷簾休訝燕來遲多情苦被春催柳葉眼無端覺屢移

一犁烟雨霽江村骯髒衡門暗斷魂覽鏡自憐空跌宕誰知跨下有王孫

送墨層樓水墨天柳堤花塢漸天妍教童為控尋春馬好事誰能乞酒錢

宣和四祀季冬夢與人環坐傑閣烹茶飲于左右



堆阿堵物茶罷共讀詩集意謂先賢所述首篇題  
云永叔誦徹三闋遽然而覺特記一句云東野龍  
鍾衣綠歸議者謂非吉兆因即東野遺事反其旨  
而足之為四絕句云

東野龍鍾衣綠歸食糞腸苦竟棲遲出門願我渾無礙未  
肯徘徊只賦詩

東野龍鍾衣綠歸溧陽何足處男兒微生縱有孤吟癖尚  
擬朝端振羽儀

東野龍鍾衣綠歸平陵投老倦奔馳黑頭我欲功名立冷  
笑馮唐白髮垂

東野龍鍾衣綠歸分甘假尉志何卑詩名藉甚徒為爾不  
及勲唐顯盛時

游春八詠并引

清明日與二三友乘輿聯袂選勝尋芳躡磴卧翠眠

紅松柏陰中溪山佳處即藉草飛觴藏鈎賭酒美花

媚人好鳥勸飲融融怡怡蕩蕩默默醒者復醉醉者

復醒如邀狂客泛一葉于鑑湖似對謫仙埽寸毫于

雲夢狂吟怪石窈窕窺靖節之優游長笑筠林自得子

猷之標致咀西山之妙劑疑羽翼之潛生煮北苑之

妍膏覺風流之戰勝典衣換酒清歡不減于少陵蠅

屐登山偉迹可誇于靈運望芙蓉于日下逸氣飄揚

拍僂掌于雲間煩襟雪釋于是留情寓景命意成詩

不覺累成篇什泊歸探囊因得八首搃其目曰游春

八詠言雖無叙聊記一時勝槩以資異時拊掌云耳



輕風破暖

單衣初試輕寒退，  
軟風襟袖袂層樓。  
高捲酒旗斜綺陌，  
亂飄花錦碎多情。  
故把惱人腸，楊柳陰中弄，  
暗看解貂不惜換，  
斗酒爛醉春光能幾場。

濛濛春鎖弄晴雨，  
花褪殘紅烟淡，  
汀潑成濃黛，  
遠山

色經茸芳草布，  
園林依約清且新，  
滑舌好鳥相和鳴，  
輕寒

作幽花一咲游人醒

嬌鶯喚友

輕煙漠漠，  
籠芳樹上有黃鸝，  
調巧語分明喚友度，  
柔情似對東風欲掀舞，  
嗟哉彼鳥非英靈，  
猶能求友鳴嚶嚶，  
光初隙末輕薄子洗耳，  
何妨聽此聲。

杜宇啼紅

蜜脾香滿青春暮，  
空山間杜宇啼紅泣，  
綠怨東風錦城舊，  
恨懷千古可堪腸斷，  
對樽前雄圖未遂，  
愁無邊，  
賴有投壺勸我飲，  
起舞從教落醉船。

狂吟紅樹

生涯隨分便蕭散，  
闌草擗蒲心緒懶，  
尚餘詩僻窮愈工，  
醉吟跌宕揮金盃，  
愛携佳客爛尋春，  
殘紅枝下細論文，  
搜羅萬象攢眉臆，  
筆端掃出春空雲。

醉眠芳草

澆愁沃恨唯憑酒，  
况值郊原湔錦綉，  
傾囊結客踏青游，  
競把鴟夷載醇酎，  
為憐芳草襯殘紅，  
猛拚醉玉眠春晝，  
覺來游眼頓增明，  
晚烟約畧橫疎柳。



捫松長嘯

亭、千尺凌雲表，鉄甲蒼髯材，獨妙班斤郢斲，猶未逢霧慘烟，淒人不要我來，感激對殘霞，獨傍叫枝發，長嘯試憑匠石親品題，棟梁合自登廊廟。

步月晚歸

風煙觸霧歡無限，倒着接羅歸去晚，林梢壁月弄清輝，闌插山花笑而莞，華堂秉燭競飛觴，浪語清狂勝絃管，探囊爭出錦段新，燦、珠璣光溢眼。

歐陽修撰集卷六

高東溪集

宋 高登撰

還山招陳希韓

乾坤莽回互，日月相盪摩，百年纔瞬息，萬類總么魔，是身非吾有，造物如吾何，觸事會心少，幽棲廢興多，眷言言意所適樂，此山之阿，脩篁擢新幹，老木榮舊枯，谷聲傳地籟，松韻答天和，獨石介而寒，寒泉淡無波，園蔬掇纖嫩，名果仍駢羅，細看著雨花，碧卷愛風荷，隨意坐莓苔，締衣掛薜蘿，得酒即酩酊，作詩共吟哦，嘯長情浩蕩，舞短影婆娑，妻孥鹿門趨，黃綺商山歌，崎嶇路僻遠，迢遞誰見過，交親憶同調，出處天靡他，每憐傷弓禽，因感赴燭蛾，無心更試藝，起投戈，自覺此身浮，相看隻鬢皤，人事何時休，歸來



勿蹉跎

偕學子遊都嶠

紹興十四年九月己巳高登以罪竄容州明年春  
戊午到竄所冬十一月壬戌遊嶠學子李彌章廬  
大勳李飛英李端禮羅述蕭巖黃宗之男扶持從  
遊

甲子秋歲抄負罪西南馳脚歷山重身墜天一涯茅茨  
蔽聚落培塿圍孤碑何處有洞天玄真之所栖維南頗挺  
拔隱隱浮修眉採菊東籬下悠然一見之欲往覺旌搖兀  
坐嗟粘竊彼美二三子知我多愛奇暇日請從我駕言出  
郊圻秣馬惴短亭稽筭登翠微天公喜我來閣雨雲垂垂  
坤靈喜我來坐休迴春姿山禽喜我來上下鳴嚶吟江海

喜我來蓓徧敷南枝興高幽尋絕

如

許鬱葱瑣煙誰遺瞿眇徒列此怪狀為憑賢主人痛

彌年非我生逢百罹不慕太廟犧况從奪袍簡欣若奪

馬羈投荒得勝踐與分宜清芬追六逸餘齡寄三危

明持甘自誓敢詞暫遊已難得短晷仍勿移山

脚趣回馭意默契欲下思懼遲準擬供

冥搜草木氣知多少淒入詩人脾暮途雙逐松

歸馬四出沒山光裏烏累風披披

歸途嘆

孫吳攄將畧申甫翰王家腐儒要底用歸種東陵瓜

自嘆

平生無技能素業世期躋唐虞憤



嘗獻瞽言

寧憚攀鳳鬚

由此隔

君來如囚拘

索

米無處

漫不分賢愚梁竦知

徒勞淵明柰

書獄訟簡沉迷眩鈇朱窓几羅蛛絲

簡篇殘

思歸

忽忽已秋抄言歸欣有期節物想吾廬青葉繁東籬流題  
白雲子蘸甲黃鵝兒對此憶羈旅多應歌式微喜慰倚門  
心愁消舉案眉稚子開簷隙遠膝牽人衣歸興念如許兼  
程猶若遲明朝秋色裏烏帽風披披

似春閣

一閣寧獨暖萬家方號寒何當放春去和氣滿人間

留別

丈夫四方志肯作兒女別顧我差崛強羨君真秀發道義  
重千鈞利名輕一葉壯風吐虹蜺忠誠貫日月挿劍露肝  
膽看鏡念勲業何當拔茅茹同在陳力列

冒寒行風雨有感

號風撼枯枿凍雨凝路塵乾坤秘日月八荒同一雲遙知  
沙漠寒黯愁殺人天涯望不極流淚滿衣襟

陳少陽贈官

憶昔靖康初厄運會中微嚴警弛邊備長驅來胡兒堂堂  
搗京闕百萬呼鼓鞞天地改色日月晴晦迷迷當宁猶未悟  
聰明遭蔽欺六賊久盤結如山矻莫移故人陳夫子忠義  
根天資拊髀惜機會徇端良在茲吾儕沐厚澤顛危合持扶



本聞王蠋賢絕脰由布衣書成數千言揮毫捷如飛明朝  
伏闕下儒冠翕相隨種李奪兵權憤痛社稷危抱書再詣  
闕慟哭聲猶悲天意難遽回人心那忍離時雍恣凶暴縱  
兵欲屠之馬前森刃利此時命垂絲腰領兩不顧相視情怡  
怡虎口僅獲脫好爵安能縻俄起故鄉情各歸天一涯壯  
哉歐陽生捨我誠所宜聖主圖興復忠誠蒙殊夷宸頃自  
責疏爵其遺君子死不亡泉壤增光輝魂氣鍾慶雲體原竟  
蒸靈芝言言英列在昭昭星斗垂蘭死則流芳豹死則晉  
皮男兒倘得死一死甘如飴君死逾生榮我生嘆奚為九  
如何作微君誰與歸

杜門

故人方謝客為問意如何午清風足夜窓明月多易招惟

酒聖難遣是詩魔一榻君家事何妨獨我過

七夕

天道杳難憑人言吁不經佳期傳七夕歡事污雙星女駭  
占蛛巧兒癡話靈我詩非好詆聊與訂頑冥

夢遊故山

風際擎披鶴雲根杖策鳩幽棲知好在歸夢故難留山放  
數峯出泉分一派流把茅何日辦縛房護松楸

送元太

但得身健何妨鬢已華胷中翻錦鏞筆下走龍蛇作椽  
只三語讀書空五車奉懷已良計去去卧烟霞

辭魏金

頃罷官臨慶士民丐留不果乃相與持金贖行勤



勤之意既不可却復不當受因請買郡庠以遺學者作詩謝之

劉君政成俄及瓜闔境歡謠騰載道民不見吏大無聲持以百錢勤父老嗟我官卑志未伸于人何德人稱好騰牒當途願丐留餽臚交馳雜金寶天涯百指携空囊號寒啼飢日相惱可取無取未傷廉念易行惟皓皓不如買書泮宮聊賢侯采芹藻別後青矜倘見思憲前黃卷宜探討

水漲謝邑宰送米

心知一字不堪煮矻矻窮年黃中食粥由來未為過儲瓶况乃嗟屢空令君好賢媿韓愈賤子愛賜慙盧仝春水從教遶舍北癡兒不復啼門東

中秋對月

綉江容州也再見中秋月歲去月圓人尚缺相望千里共婵娟苦恨亭亭照離別今夕一樽誰與同孟光舉案對梁鴻衆雛立侍儼成列以次持盃壽乃翁乃翁看月指病目手足頑麻壽髮禿但願團欒三十秋不計東西與南北

臨別示子姪

不能枉道取雷貴是致爾輩愁飢頻年離情更惡兩地狼狽心何安從人數寄安否問使我相思懷抱寬平生竊笑曹家見臨岐莫墮雙闌干

乞米

臣飢欲死侏儒飽方朔誰憐是歲星館下諸生笑豐暖江頭漁父誚清醒魯公已作乞米帖陶令旋尋諸粟餅親舊依然眼相向故應特地為我青



覓蠹椽

寒寒官冷家乏薪炭與舒丞懇令長至劈酒槽  
孫處可笑亦可憫也

顧影低回祇自憐怕時寒聳作詩肩全家食粥已數月  
客無氈今幾年君劈槽燒當止酒我和琴爨况無弦雪中  
送炭從來事况寫羈躬覓蠹椽

小源欲歸

潮頰香醪暈醉紅鞵敲歸路勒青驄水涵萬頃曾孫稼月  
逗盈衿少女風大誤平生緣畫足無聊中夜祇書空擬將  
方守難論事直扣天門問化工

立夜道中

黃茅時節瘴烟濃人在山凹第幾重梁竦負才徒感慨  
康賦性本疎庸此生自斷天休問吾道年世不容會脫  
幘巾還舊隱鹿門妻子憤相從

言懷

歸去東臯獨荷犁林書卷有兒持一無可意夙將老百  
不如人心自知夢寐摩挲元結頌經從省憶少陵詩體膚  
悟盡天應錯依舊矍然山澤姿

九日

塞鴈南飛度戍樓一聲天地有餘秋家連滄海窮難目人  
在蠻流欲盡頭莫效消埃禪國計况無毛髮為身謀所須  
菽水能多少踪跡飄然不繫舟

病中雜興

溶溶瘴霧暗朝曦咫尺山關號鬼門疾病年年不相貸朱



顏凋盡赤心存

垂老飄零萬里餘肌膚瘦盡髮毛疎  
皇恩若許歸山去豆地雖存不解鋤

不羨雲霄歎網羅百年人物總相磨  
死如歸耳生如寄造物從今柰我何

九死窮荒一病翁曉來猶怯北窓風  
誰知葵藿傾心切待日輪升大空

不辭南北歎颺零俯仰乾坤一草亭  
鳶墮水土從蹈蹈鴻飛天外自冥冥

長袖深藏批救手短筇斜倚作詩肩  
有時極目睨遼漢興在孤鴻落照邊

病損腰圍減未休二毛垂領颯光秋  
夢中那復化為蝶狀

下不妨聞聞牛

口腹相煎亦可羞飢來欲食飽還憂  
一編地下我無用許學留侯辟穀不



Large stylized watermark or seal, possibly reading '圖書' (Library/Book).

Small square seal impression, likely a library or collector's mark.

鈔本 (Copied Manuscript)



程